

يوميات
#ساندي و چيمي

أحمد أبو النصر



دار اكتب للنشر والتوزيع

بوميات

ساندي وچيمي

أحمد أبو النصر

تدقيق لغوي : خالد رجب عوَّاد

رقم الإيداع : 2015/27230

- I.S.B.N: 978-977-488-432-0

دار اكتب للنشر والتوزيع



الإدارة: 10 ش عبد الهادي الطحان من ش الشيخ منصور،

المرج الغربية، القاهرة.

المدير العام: يحيى هاشم

هاتف: 01144552557 – 01147633268

E – mail: daroktab1@yahoo.com

Facebook: دار اكتب للنشر والتوزيع

الطبعة الأولى ، 2015م

جميع الحقوق محفوظة ©

دار اكتب للنشر والتوزيع

يوميات

#ساندي_و_چيمي

إهداء

لكل واحدة بتقول لحبيبها يا "بيبي" عشان تاخذ مصلحتها..
لكل ست مشاكسة ومفترية وبتستقوى على الكائن الضعيف
اللي عايش معاها..
لكل واحدة شايفة نفسها كيو، وهي مخبية جواها شخصية
"ماري منيب" في فيلم حماتي قنبلة ذرية..
للرجالة الغلابة المقهورة اللي زي حالاتي..
لكل راجل بيتعشى ع السرير قدام التلفزيون - برضه زي
حالاتي..
للناس الحلوة اللي خلتنني أكتب الحلقات دي ومزهقتش ولا
ملت مني..
للطيبين والطيبات في أرض لله.. ابتسموا وضحكوا محدش
واخذ منها حاجة..

المنافسة والمشاركة هما اللي بيخلوا للحياة طعم!
هاتلها وردة أو دبدوب، أو حتى قولها كلمة حلوة..
الانجليزي لغة للتواصل مش للفشخرة..
اعمليله أكل بدل ما تتفرجي على برامج الطبخ وبس..
الستات بتتعب أوي في المذاكرة للولاد.. بس بصراحة يستاهلوا حد
قالهم يخلقوا!

اوعى تعاكس واحدة على الفيسبوك اسمها " Ana Aslan
Dalo3a " عشان غالبا دي مراتك!

الفسخ ضار بالصحة ويسبب الوفاة!
اضحكوا عشان تعيشوا بصحة كويسة..

مقدمة

يوميات ساندي وجيمي هي يوميات كوميدية متصلة منفصلة بين زوجين جمال أو جيمي، وفكرية اللي بتحاول تبقى ساندي، باختصار الحدودية حدودية بيوت مصرية كثير.. بتحكي عن ستات الطبقة المتوسطة اللي نفسها تعيش دور هوايم جاردن سيتي لكن الطبع غلاب..

ساندي متجوزة جمال من عشر سنين، وعندهم ٤ عيال.. شكري ٩ سنين، ونعناعه ٧ سنين، وعائده ٤ سنين، وناير عنده سنة.. ساندي ست غيرة وطيبة ونكدية وقفيشة، وبتحاول تبقى جميلة.. نفسها عيالها يبقوا زي ولاد الناس الهاي ويقولوا "مامي".. بتحب تشوف برامج وقنوات الطبخ اللي فيها البروكلي والروزماري، صحيح هي متعرفش إيه هو الروزماري، بس برضه بتحب تتفرج.. الجميل بقى إنها بتأكله يا تونة يا كشري من الشارع.. كمان ساندي ست مصرية بتموت في اللت والعجن والنميمة في الأفراح ومبيعجهاش العجب، مكياها كثير وبتاخذ وقت طويل وهي بتلبس العيال.. نفسها تعيش الحياة الرومانسية مع جوزها ويجييلها ورد ودباديب في عيد ميلادها وفي الفالانتاين.. إنما هو راجل حياته كلها شغل وأكل وماتشات.. زوجين زي معظم الأزواج المصرية، بيروحو المصيف، ويتسوقوا في كارفور، ويتسبحوا في جنية الحيوانات.. الحلقات بتتطرق لقضية التحرش،

وساندي هتموت وحد يتحرش بيها.. كمان الحلقات ناقشت علاقة
الست بحماقها والمفارقات الكوميديّة اللي بتحصل لما الحماة بتزور
مرات ابنها.. ساندي بتحب الموضة مووووت، وبتعشق إستايل
هوانم زمان، ونفسها الزمن يرجع بيها لورا.. ويا سلام لو عندها آلة
الزمن عشان تروح تعيش في الزمن ده!

ساندي بتكذب كثير عشان تكلفّ جيمي وتاخذ منه فلوس..
بتحب بيتها، وبيطلع عينها في المذاكرة مع العيال زي كل أم مصرية
نفسها ولادها يبقوا أحسن ناس.. بتغير على جيمي من عفاف اللي
معاه في الشغل.. هي عمرها ما شافتها بس بتسمع عنها كثير.. سمعت
عن الدايت مجرد سماع بس مش أكثر لكن عمرها ما فكرت تستمر
عليه أكثر من ساعة وتلت..

جيمي بقى كائن أكل، بيعشق الأكل بس مش بينوبه من الأكل
غير الكشري.. بيعحب الأهلي ونفسه ينطلق مع أصحابه، لكن
ساندي طابقة على نفسه طول الوقت.. وهو زي كل الرجالة بيعحب
الستات ويعمل شات ع الفيسبوك بس ساندي مش سهلة وكل مرة
تقفشه..

الحلقات موافقها كثير ومش بتخلص لأنها ببساطة بتحكي حياة
كلنا عايشينها..

أحمد أبو النصر

1

BCC سفرة

مشهد عبثي في صالة البيت..

شنت مدارس في كل حنة.. فرد جزم مرمية وشرابات المفروض
إنها بيضة بس هي مطينة .. صوت عياط عيل صغير.. وفي الخلفية
صوت تليفزيون عالي جدًا..

- واد يا شكري.. هاتلي ورقة وقلم وحط التينة في بؤ ناير..

= خلي نعيمة تحبيلك أنا بلعب ع الكمبيوتر.

- اخلص يا زفت البرنامج هيبدا.

= خدي ومتندهيش تاني.. والحقي ناير عشان واقف ع السلم
وهيقع.

- قومي يا نعاة هاتي اخوكي.

= حاضر يا ماما.

- قولي مامي يا روحي زي مي بنت طنط مرفت.

= حاضر يا مامي.

- حبيبة قلب مامي.. وسعي كده عشان البرنامج بدأ..

على الشاشة يظهر شنب كبير طالعه وش بنضارة ونازل منه
كرش برجلين: أهلاً وسهلاً بكم في حلقة جديدة من برنامجكم
الشف.. النهاردة طريقة جديدة لعمل صدور الفراخ.. فراخ
بالروزماري المقادير:

- كيلو صدور فراخ - كوب زبادي - ملعقة جربيل طازج -
ملعقة ثوم مفروم - ملعقة زعتر - ملعقة روزماري - ملعقة مستردة -
ملح - فلفل - ملعقتين زيت زيتون - أرز للتقديم..

طريقة العمل.. نخط كوباية الزبادي كده في بولة كبيرة وعليها
الروزماري وملح وفلفل ونقلب كده...

= إيه يا فكرية الدوشة دي.. صوت التليفزيون جايب الشارع.

- جيمي حبيبي.. اقعد كده ولا كده خليني أخلص الحلقة..
وبعدين ميت مرة أقولك بلاش فكرية قولي ساندي..

= يا مثبت العقل.. يا بنت الناس أنا متجاوزك فكرية.. إيه حكاية
ساندي دي اللي مخولتك دماغك؟!

- چيمي.. بي كool، ووسع من قدام التلفزيون، عايزة اعرف
طريقة الفراخ بالروزماري.

= روز ايه؟ وايه الروزماري ده يا "ساندي"؟!

- الروزماري.. والنبي يا چيمي ما اعرف.. تصدق سؤال وجيه..
بس شكلها حاجة مش وحشة..

= ومين الراجل اللي وشه كله شنب ويقلب الأكل بإيديه بالمنظر
المعفن ده.. أنا هرجع يا ساندي!

= إمسك نفسك يا چيمي.. خلاص الشيف قرب يخلص..

...وبعدين نطلع الطبق من الفرن ونقدمه مع الرز البسمتي وبالهنا
والشفا..

= خلاص يا ساندي هانم..

- خلاص يا چيمي.. أغرفلك تاكل يا روحي؟!

= مش اعرف عاملة ايه الأول؟!

- بص هو أنا ملحقتش والنعمة.. العيال مجنناي يا چيمي.. بس
جيايالك تونة حلوة طحن.. ثانية واحدة وأكون حاطهالك في
الطبق..

= حطوكي في نعش يا بعيدة.. مضيعالي الوقت كله فرجة على
BCC سفرة عشان تأكليني تونة! أنا كنت حاسس من أول ما سمعت

كلمة جيمي إن وراكي مضية.. داهية تاخذك انتي والراجل ابو شنب
اللي عايش معانا كل يوم ده!

- إخس عليك يا جيمي.. مش بتعلم يا بيبي ..

بكرة أغرقك في الروزماري يا حبيبي!

&&&

2

الفرح

- يَلَّا يا فكرية إتأخرنا.. بقالك ساعة قدام المراية..

= إيه يا جيمي.. مش عايزني ابقى مُرّة.. ده الواحد بيستنى الأفراح عشان يتألق.. وبعدين هو ده فرح عادي.. ده في المدفعية.. يعني الشياكة يا جيمي والأكل الفاخر.. خد هنا.. إنت قلت إيه؟! فك... إيه؟! فكرية؟! وديني لو قلت فكرية تاني لاكسرلك البرابريز اللي على عينيك.. اسمي ساندي:

- يا ست ساندي هانم يَلَّا اتنيلنا إتأخرنا.. وبعدين إيه كمية الألوان اللي في وشك دي؟!

= ده ميك أب يا روحي عشان أشرفك.. بقولك إيه متنساش
تاخذ حفاظتين من الكيس اللي ورا باب الحمام وحطهم في شنطتي
عشان ناير ميزروطش الدنيا في الفرع..

- طب تيجي إزاي ساندي وميزروطش! الاتنين دونت ميكس..
أنا إيه اللي رماني الرمية السوداء دي يا ربي!

= بتبرطم بتقول حاجة يا جيمي..

- خالص يا روحي.. بقولك أنا نازل أسخن العربية.

= طب لبس نعناعة الجزمة هي وعايذة وإتاكد إن الواد شكري
قفل السوستة.. وخذ ناير معاك وأنا هحصلك..
في قاعة الفرع..

= إيه اللي لابساه مها ده؟ مشجر؟! هي رايحة الحديقة الدولية!
وايه كمية الميك أب اللي ف وش العروسة ده!
- خلىنا في نفسنا يا روحي..

= على رأيك.. بس أخذت بالك من شياكة الواد عادل ابن
خالتي؟!

- أنا بصراحة اللي لفت نظري فستان مراته.. جامد أوي يا
ساندي.. وماشي مع شعرها الأصفر والشال واخذ نفس لون
الصندل..

= كل ده شفته يا جيمي في اللحظة اللي سلمنا فيها.. إيشحال
لو مكنتش بنضارة والقاعة نورها هادي كنت شفت فيها إيه..
وبعدين خد هنا.. صندل إيه يا عينيا اللي أخذت بالك منه.. دانت
عمرك ما ركزت مع حاجة أنا لبستها! إركز يا جيمي ومتلعبش في
عداد عمرك يا روحي!

- يا ستي أنا مالي.. يولع عادل ومراته.. خيلنا في عيالنا اللي زي
القرود دول.. ولا يا شكري سيب شعر اختك.. وانتي يا بت يا
عايدة بطلي تزهقي في اخوكي اللي على رجلي بدل ما أرميه في
الأرض..

= إيه يا جيمي الأطفال أحباب الله.. سيب العيال تفرّج عن
نفسها.. قوم نرقص سلو مع العريس والعروسة!

- البيست مش هيستحملك.. وكمان في عيل على حجري..

= يخرب بيت دمك اللي يلطش يا جيمي.. سيب ناير مع
نعناعة.. خلي بالك من اخوكي يا نعناعة..

*حاضر يا ماما.

= قولي مامي يا روحي.

*حاضر يا مامي..

على البيست العريس والعروسة والكابلز اللي في الفرع..

- ساندي.. ساندي.. سااانديييي!

= إيه يا جيمي.. سيبي اعيش اللحظة..

- لحظة إيه وهباب إيه.. انتي واكله بصل؟

= أعدمك لو كنت كترت عن بصلتين خضر مع طبق العدس
اللى كان فايض من غدا امبارح..

- الله يخرب بيت مخك.. عميتني طول الرقصة وشغالة تنهيد..

= يا بيبى والمصحف بعيش الرومانسية..

- انجري قدامي ع الترايزة..

= طب بقولك إيه البوفيه بدأ قوم عشان تجيب معايا..

— مش قايم .. هاتي انتي ..

= قوم يا چيمي عشان تشيل معايا الاطباق.. أقولك هات انت

الکول سلو.. عارفه؟

.....

= إيه يا چيمي .. مالك متح ليه .. الكول سلو .. سلطة الكرنب

یا روحی.. وکتر عشان العیال..

بعد الفرح.. في الطريق للبيت..

- افتحي الشباك اللي جنبك يا فكرية.. وحطي إيدك على بؤك
وانتي بتاوي.. أنا اتعميت من البصل!

= ساندي يا جيمي .. وبطل فكرية لحسن والنعيمة هزعلك وأنا
واكلة كرنب وممكن اعميك!

- يا منجي من المهالك يا رب! هقول ساندي.. بس ورحمة الحاج
حسانين أبوكي بلاش مش عايز النظارة تشبر..

&&&

3

الأهلي

- إيه اللي في إيدك ده يا جيمي؟

= ده تسالي من المقلة.. شوية لب أبيض على سوبر على شوية
سوداني بقشره..

- إنت طالع جونينة الحيوانات يا جيمي.. خدني معاك يا روحي..

= جونينة! لا مش رايع الجونينة.. أنا جايب الحاجات دي عشان
الماتش بتاع الأهلي النهاردة..

- آآآه.. تقصد ماتش الكونفيدرالية اللي مع سيوي بتاع ساحل
العاج..

= يا بنت الأروبة.. وانتي إيش عرفك؟ بت يا فكرية.. انتي
بتفرجي على ماتشات وأنا في الشغل وساية شغل البيت والعيال؟!

.. اهدى يا جيمي لا يطلقك عرق يا اخويا .. وانت لسه صغير ع
الهم يا روجي .. لو قلت فكرية تاني هزعل يا جيمي، وانت عارفني لما
بزعل بقلب على نعيمة الصغير .. اسمي ساندي .. آس إيه إن دي
واي! ماتشات إيه اللي اتفرج عليها بس .. يا بيبى أنا مشتركة في
يللا كورة وييجيلي أبديت عن الماتشات والنتائج ..

= بيبى! ماشي يا ساندي .. عمومًا حضري الغدا بسرعة عشان
الماتش فاضله ساعة ويبدأ ..

- كان بودي يا جيمي .. بس الأنوبة خلصت! هعملك
ساندوتشات تاكلها وانت قدام التلفزيون ..

- بت يا نعاة ..

* نعم .. هاتي كيس العيش من المطبخ واللانشون م التلاجة .

* حاضر يا ماما .

- قولي مامي!

* حاضر يا مامي ..

- تكسي حبيبة قلب مامي وتسلمي من كل شر .

بعد ساعة ...

السلام عليكم ورحمة الله وبركاته .. أعزائي مشاهدي قنوات بي
إن سيورت في كل مكان أهلاً وسهلاً بكم .. من استاد القاهرة الدولي
معكم معلقكم أحمد عبده للتعليق على المباراة النهائية بين الأهلي

المصري وسيوي سبورت الإيقواري في نهائي بطولة الكونفيدرالية..
تشكيل الأهلي النهاردة..

- حاطط عماد متعب في التشكيل.. يا وكستنا يا وكستنا.. يا
شمانة الزمالكاوية فينا!

= بطلي ندب خليني اركز في التشكيل.. وبعدين انتي إيش
فهمك انتي في الكورة والتشكيل!

- يا جيمي متعب راحت عليه بعد يارا خلاص.

= وانتي كمان عرفتي يارا!

- شور يا بيبي.. البت جابته الأرض يا جيمي.. وكسته.. اسألني
أنا عن صنف الستات دول.. يا ترفعلك لسابع سما زي مانا عاملة
معاك كده.. يا تخليك عماد متعب.. آه والنعمة..

= سابع سما! هاااار اسود! انتي خيالك عظيم يا ساندي.. اسكتي
بقي شوية عشان اركز في الماتش.. كده برضه يا تريزيجيه تاخذ إنذار
ومتلعبش كده.. آه يا تريزي آه..

- سلامتك يا اخويا.. انت قعدت على دبوس؟

= لا ليه!

- طب أخذت حقنة؟! البواسير تاعباك؟ مالك يا اخويا.. بتشتكي
ليه؟

= انتي اقبلي يا ساندي.. إيه اللي بتقوله ده؟!

- مش انت يا جيمي اللي بتتوجع وعمال تقول آه يا مش عارف
إيه آه!

= يا معاقفة.. تریزیمیه ده لعیب فی الأهلی، وانا بدلعه بقول
تریزی.. انتی دماغك شمال؟!

- إخس علیك یا جیمی، وأنا اللي بقول إنك انت الحتة
الشمال.. ناحية صبري رحیل وسید معوض سابقاً..

=عاه! أشوف فیکي یوم یا بعیده.. اهملدی عایز اتفرج..

- خرسنا.. اتکتمنا.. حطینا لسانا فی بؤنا وسکتنا.. أهو.. أهو!

= بت! هموتك والمصحف.. یا تقعدی ساکتة یا تقومی..

-.....

دخلنا فی الدقیقة تسعین من عمر اللقاء والنتیجة لا تزال التعادل
السلبی بدون أهداف، وطبعاً النتیجة فی صالح سیوی سبورت اللي
كسبان علی أرضه ۲-۱ .. الحكم الرابع بیعلن عن ۶ دقائق وقت
محتسب بدل ضائع..

-والنیمة لو قعدوا ست ایام مش ست دقائق مفیش فایدة..
جاریدو ده فاشل یا جیمی.. سایب عماد متعب فی الملعب لحد
دلوقت لیة.. ما یطلعه خلینا نکسب .. طیبی بقی ده المستوی!

= أنا زهقت منك ومن الماتش وهسیلک الدنیا کلها وأقوم انام..
هی لیلة غم من أولها!

- خد يا چيمي أمّا اقولك.. يا بيبي.. بيبي!

جووووووووون.. جووووووووون.. جووووووووون.. عماد
متعب يفعلها.. وتشتعل مدرجات إستاد القاهرة.. الله عليك يا
عمدة.. الله عليك يا ابني.. عالمي يا متعب...

= إيه جون؟! مين اللي جابه.. ها.. ساندي مين اللي جابه؟

-

= مالك اتكتمتي ليه.. مين اللي جاب الجون؟

- المهاجم المخضرم بتاعنا.. هو فيه غيره .. متعب.. الواد ده
نجم.. آه والنعمة.. والبت يارا وشها حلو.. وراء كل عظيم يارا ..
هي الستات كده اسألني انا يا تاخذك لسابع سما زي ما يارا عاملة في
متعب.. يا توكسك بعيد عنك يا چيمي وعن السامعين..

= قومي يا واكساني من هنا.. قومي الله يحرقك يا بعيدة ضيعتي
عليا الجون..

- تتعوض يا چيمي.

&&&

4

كارفور

- چيمي.. هات عريية وخط فيها ناير.. واتأكد يا بيبي إن عجلها
مش أحول..

= حاضر يا ساندي!

- چيمي.. انت سخن يا اخويا.. فيك حاجة مزعلاك؟!

= لأ ليه؟

- انت قولتلي حاضر يا ايه؟ ساندي؟!

= آه .. ساندي.. مش انتي بتحبي الاسم ده؟

- آه بحبه.. أمّا نشوف آخرتها.. معاك ورقة الطلبات؟

= آه يا روجي.. معايا ومجهزها في إيديا..

-- هاناار اسود ع الطاعة.. هتفرسني يا جيمي..

اللي نجيبه تشطّبه يا بيبي..

= شور يا روحي..

- طلعت روحك يا جيمي انت وراك مصيبة

= بتقولي حاجة يا ساندي؟

- لا خالص بقولك تسلم روحك يا جيمي.. شطّب ع المكرونات

يا حبيبي!

= حاضر..

- ناولني إزازة الزيت الثلاثة لتر وشوف الأوفر اللي عليها..

= اتفضلني يا حياتي..

.....-

= في حاجة .. مالك مبحلقالى كده ليه؟!

- ها! لأ خالص.. مفيش!

- شطّب يا جيمي الورقة.. شطّب!

= ساندي.. ساندي..

- ايه يا جيمي.. انت بتنادي على عيل تايه؟

= شايقة البادي ده.. لونه حلو أوي وهيليق عليكى .. استنى بقى
بصي البلوزة دي كمان هتبقى تحفة ع البادي.. خلىنا نشوف جزمة
كمان تمشي معاهم عشان يبقى طقم حلو..

- والنعمة انت عامل عملة!

= عملة! عملة إيه؟ ليه سوء الظن؟!

- جيمى.. إعقل يا حبيبي.. وعقلك في راسك تعرف خلاصك..
وامشي عدل تختار فكرية فيك!

= مين فكرية دي.. قصدك ساندي!

- لأ فكرية يا جمال.. ومتخلينيش أطلع وش بين السرايات عليك
يا بيبي!

= يا بنتي مش انتي اللي بتقوليلي عايزاك تبقى رومانسي.. نفسي
أعيش اللقطة.. انكشني يا جيمى.. واجعلني منحرفة.. وكلام زي
كده؟!

- أبوة حصل .. اجعلني منحرفة .. مش انت اللي تنحرف!

= فكرية.. كلامك جارج..

- جيمى!

= بصي يا روحي الصراحة.... أنا.. أنا..

- استنى بس انت هتعملي فيها عباسط حمودة وهتقعد تقولي أنا
أنا.. انت قلت فكرية؟

= فكرية؟ فكرية من سلامة السمع.. ساندي.. ساندي يا
روحي..

- إنجز..

= أصل..

- جيمي.. إنجز.

= بصي بقي من الآخر كده.. في رحلة معمولة في المصنع ٣ ايام
الغردقة وعائز أطلعها.. والله فلوسها بعيدة عن المصروف .. دي
فلوس الأوفر تايم..

- غردقة.. ٣ ايام.. رحلة.. فلوس الأوفر تايم.. إمم.. بص يا
بيبي.. أنا عشان خاطر صدقك.. مش هأخذ معاك قرارات تعسفية..
لأن بكل بساطة انت راجل ومن حقت تعمل اللي انت عايزه..

= إنتي أعظم ساندي

- أنا لسه مخلصتش.. أنا كنت بقول تعمل اللي انت عايزه وأنا
رجلي على رجلك.. مش لوحذك يا جيمي.. وبعدين اللي يعوزه
البيت يحرم ع الغردقة يا بيبي.. هات البادي والبلوزة على ما انقي
الجزمة يا حياتي..

=

- في حاجة يا جيمي..

= الله يخرب بيت اليوم اللي شفتك فيه!

&&&

5

مترو الأنفاق

- يعني هو حبك مشوار أختك في اليوم اللي العربية تعطل فيه؟

= خلاص بقى يا چيمي.. الناس عازمين.. وبعدين عزومة نورا
أختي متفوتش.. شوية أكل الواحد مش هيشوفهم إلا في عزومة
رمضان الجاي.. وكمان عندها واي فاي.

- بس مشوار المرج بعيد أوي عن دار السلام يا فكرية.. والمترو
بهذلة..

= يا بيبى في سبيل البط والحمام كله يهون.. وبعدين إنسى فكرية
دي خالص.. اسمي ساندي.. شفت أنا هادية إزاي.. لكن هتقول
فكرية تاني.. والنعمة لا هأقولهم إنك عامل دايت وما هخليك تحط
لقمة في بؤك!

- طيب يا ساندي هانم.. يا مدام ساندي.. يا اسـ...
 = آنسة من فضلك!
- يا بلوة مسيحة ركزي.. هنركب المترو إزاي بالأربع عيال
 وشنطة الهدوم دي كلها؟
- = تدبر يا بيبي.. يلا بقى متعطلينش عايزة ألم الحاجة بتاعة العيال
 في الشنطة.. شفت كنت هتسيني الحفاضات بتاعة ناير..
- حفظت خلاص.. هأخذ اتنين من الكيس اللي ورا الباب..
 = شربات يا بيبي .. أشوفك ضابط بحرية.
- ضابط بحرية! طب يا فالحة أنا هزل أوقف توكتوك يودينا
 المحطة.. متلطعيناش ساعة..
- = طيارة يا جيمي.. إستنصف التوكتوك.. وخليه يشغل مهرجان
 الدنيا شمال.. بموت فيها!
- انتي متناقضة يا ساندي وهتخشي النار!
 = بموت فيك يا مضروب..
- في محطة المترو...
- = هات ناير عنك يا جيمي..
- اشعنى؟! انت عمرك ما شلتيه..
- = انت تعبان وشقيان يا اخويا.. أمسك انت البنيتين والشنطة ..
 وانت يا واد يا شكري خليك جنب ابوك..

- خدي الواد.. بس بالراحة عشان الكعب اللي ملوش لازمة
اللي انتي لابساه ده..

= ده التالق يا جيمي.. إيش فهمك انت يا بيبي..

بعد أربع محطات...

= جيمي.. جيمي..

- ايسيه عايزة ايسيه؟ يقطع جيمي ع اللي جابو جيمي!

= إيه الزحمة دي! وايه الريحة المعفنة دي! الواد خدلّ دراعي

ومحش قام وقعدني!

- انت مش قولتي كله يهون عشان البط والحمام! وبعدين انتي

متخيلة إن حد هيقوملك؟! الناس اللي قاعدة دي لازقة بقالها ٣

شهور يا ساندي.. اللي واقفين بيتبدلوا عليهم.. غالبًا دول مش

ناس.. دي ديكورات في المترو..

= طب خد ناير..

- انتي مش قولتيلي انت تعبان وشقيان يا اخويا؟!

= بطل رغي يا جيمي.. الكعب ورم رجليا .. امسك الواد

هكفي على وشي..

- هاتي يا بعيدة.. إلهي تكفي تحت العجل!

= بتقول إيه مش سامعاك من الدوشة؟!

- بقولك هاتي يا روحي .. يخليكي ليا ربنا!!!

= والنعمة شكلك كنت بتدعي عليا.. بس هقول إيه مضطرة
احتملك يا مهجة الفؤاد..

*يا أستاذ ياللي شايل العيل تعالى أقعد..

- لا شكرًا كتر خيرك

*تعالى بس أنا نازل الجاية

- طيب متشكر.

= خد تعالى هنا هات الواد أقعد أنا بيه..

- إنتي مش قولتيلي خد الواد دراعي اتخدّل؟!

= هات الواد أقعد بيه بدل ما أعملك فضيحة!

- طب خدي الواد وبسرعة قبل ما يقعد حد.. يا كابتن .. انت

يا أستاذ ياللي هتقعد.. الراجل قام عشان أنا معايا عيل.. حضرتك
مش سامعني.. يا كابتن رد..

*في حاجة يابا أنا قعدت خلاص.. معاك ست .. معاك عيل مليش
فيه!

- طيب يا أفندم حقك علينا..

= سيبني عليه يا جيمي الواد ده..

- بس يا ساندي إهدي.. إهدي الله يهدك في يومك الاسود ده..

= طب خد الواد.. أنا مش قادرة!

- الله يخرب بيت دي خروجة.. خد الواد .. هات الواد! هاتي
ومش عايز اسمعك لغاية ما نزل...

= طب أنا عايزة أقلع..

- نعم؟!

= يا بيبى أقلع الجزمة.. الكعب هيموتي!

- الكعب يموتك ولا ريحة رجلك تقتل كل البشر دي.. امشي يا
ساندي من جني..

* يا أستاذ.. تعالى حضرتك اقعد.

- شكراً .. كتر ألف خيرك.

* يا باشا العفو .. ربنا يخلي عقبال ما تشوفه عريس.

- عشت

= چيمي.. چيمي .. قوم وقعدني..

-

= يا بيبى مش قادرة أقف.. خليك متحضر وقوم وقعدني..

- في حاجة حضرتك بتقولي حاجة!

= يخرب بيتك بتزعق كده ليه انت هتفضحني..

- حضرتك عايزة حاجة.. الله يسهلك..

= چيمي.. متخلينيش اُحوّل .. قوم وقعدني.. چيمي.. انت
هتعمل فيها نايم.. چيمي!

xxxxxxxxxxxx

&&&

6

التحرش

- بتعملي إيه يا ساندي؟

= حرماً يا جيمي.. قاعدة بواكب العصر.. إقلع الجلاية البيضاء
يا حاج وتعالى واكب معايا.. عقبال ما تيجي من الحجاز يا بيبي.

- أنا عايز أتغدا وأريح شوية عشان أقوم أتفرج على آراب
أيدول..

= همك على بطنك.. يا جيمي فكك بقي من شغل المراهقة بلا
أيدول بلا بتاع.. وتعالى هنا عشان ناير لسه نائم..

- وفين شكري والبنات؟

= ناموا يا بيبي.. مش هتيجي تواكب معايا العصر..

- لا أنا عايز أفضل بوضوئي للعصر.. فين بنطلون البيجاما؟

= ما توطي صوتك يا جيمي.. ولا اعمل نفسك فايريشن..
هتبقى مسخرة في الهزاز يا بيبي.

- إلهي تتحطى على السايلنت مود طول العمر يا بعيدة..

= بتقول حاجة يا بيبي؟!

- مبقولش! بس انتي مش واحدة بالك انتي صوتك عالي إزاي؟!

= تموت في المقاحلة يا جيمي.. خد بقى عايزة أسألك على حاجة..

- أديني جيت.. عايزة إيه؟

= يا راجل فرفش دا انت قاعد مع مُرّة والكيدز نايمين والشيطان عمال رايع جاي في الأوضة..

- استغفري ربنا ع الكدبة دي يا فكرية.. مُرّة إيه بس!

= استنى طب اما أرقعك بحاجة في وشك على فكرية دي واستغفر ربنا ع الحاجتين..

- إخلصي طيب يا ساندي عايزة إيه؟

= ايه موضوع التحرش اللي مالي البلد ده؟

- اشعنى؟ وبعدين إيه اللي عرفك انتي بموضوع التحرش؟

= قريت حاجة ع الفيس بتقول إن دي تاني حالة تحرش الشهر ده.. مانا يا بيبي مشتركة في المصري اليوم..

- مشتركة! المهم بصي يا ستي التحرش هو.. هو.. هو التحرش..

= لا يا راجل؟! إزاي يعني؟

- يعني بسبب غياب الوعي والانحراف الأخلاقي تلاقي في الحنت
الزحمة العيال قلالة الأدب بيحطوا إيديهم مثلاً على كتف البنات..
أو مثلاً.. يعني.. يعني... أهى عيال وحشة وخلاص..

= وانت مش هيغيب وعيك وتنحرف؟

- نعم؟!

= وده بيحصل فين يا جيمي؟

- إيه ده اللي فين؟

= في أهى شارع يعني؟! أهى منطقة؟! الساعة كام؟! كده يعني؟

- وإيه نظرة الاهتمام على وشك دي.. هتروحي مثلاً!

= فشر.. أنا لستُ ذلك يا عنيا.

- أنا متأكد يا روحي.. انتي وجودك في الشارع شيء مثير للعفة
والفضيلة..

= إخس عليك.. طب لعلمك أنا حصلي حاجة زي كده
ومرضتش أقولك عشان دمك ميفورش..

- لا متقلقيش مكنش هيفور..

= وأنا قعدت أقاوم وأقاوم .. وهذا الذئب البشري مش مخليني
أتعنت من مكاني..

- بطلي فتي بس بالبكر اللي في شعرك ده.. يعني كذب وغاوة..

= متخلينيش أقولك مين عشان مجروحش رجولتك..

- لا قولي.. أنا نفسي أتفشخر قدام أصحابي إن فيه مغفل غيري
عبرك..

= كده.. طب أنا هقولك ورزقي على الله.. بس أمسك نفسك يا
چيمي.. محصلش حاجة وحياة شكري ونعناعة..
- إخلصي!

= الراجل اللي في الخامس.. جوز الحاجة ناهد..
- اللي في الخامس.. اللي في الخامس.. ناهد دي اللي بخمار،
مرات الأستاذ عماد؟!

= أه باين.. أه هي.. صح.. أروب يا چيمي.. بأربع عيون
صحيح بس تعرف الكُفت.. هو فعلاً كان بيقول عماد..
- يا معاقة هو هيقول عماد ليه.. هو اسمه عماد..

= أه صحيح.. بس هو كان باين بيقول عماد يعمل اللي عايزه يا
سانديسي..

- هو كان بيقول يا سانديسي كده؟
= آه والنعمة يا چيمي إن شا الله أتشل لو كنت بكذب يا
بيبي...

- بصي هو من جهة هتشلي فده مفروغ منه..
= اهدا يا چيمي ومتعصبش واللي اكسو يتصلح يا اخويا.. المهم
صحتك.. ودي كانت مرة وراحت لحالها..

- اهدا إيه واتيل إيه.. انتي شفتيني اتعصبت خالص.. انتي عارفة
الأستاذ عماد اللي بتكلمي عليه ده.. عنده شلل ونظره ضعيف.. يا
فاشلة!

= والنعمة.. أكونش أقصد الناس اللي في السات!

- اكتمي.. أنا هخش أنام وصحيني على أراب أيدول.. خلييني .
أشوف الستات اللي بجد..

= جيمي.. بيبي.. جيمي.. طب تعالى قولي العيال المتحرشة بتروح
آهي شارع.. جيمي.. طب بالنسبة للشيطان اللي كان معنا في
الأوضة.. جيمي.. إلهي النور يقطع أول ما الكاميرا تيجي على نانسي
وييجي والكاميرا مثبتة على أحلام بس قادر يا كريم!

&&&

7

المصيف

- جيمي.. قوم يا حبيبي بابا جاب موز.. جيمي .. قوم يا بيبي..

= إيه يا فكرية.. شي الدنيا اتهدت؟!

- لأ يا روعي متهددتش.. بس أنا ههدھا على دماغك يا بيبي..

عشان تبطل كلمة فكرية خالص.. نفسي مرة تصحى تقولي ..

بونچور يا ساندي!

= بونچور ويا ساندي؟! الاتنين؟! ده انتي يتفاتلك بلاد! اخرجي

بقي عايز أناام..

- يا جيمي قوم بقی هو انت جايينا هنا عشان تنام.. قوم قوم

خلينا نروح البحر من أوله..

= هو فيلم تروحيه من أوله! ما هو البحر هو هو.. خليني أنام
ساعة وبعدين نقوم نروح.. ومين الواد المعظم أبو مايو ده؟ مش ده
شكري ابني؟!

- تقصد كلب البحر اللي واقف ده.. أه يا بيبي هو شكري.

*أنا كلب بحر يا ماما؟

- قول مامي يا واد.

*لأ.. هقول فكرية.

- فكرية في عينك يا جزمة.. والنعمة بالشبشب على قفصك
الصدري وانت شبه قرموط البحر كده..

ما تقوم يا جيمي.. نفسي اشوفك بالشرز الهواي يا شقي.

= أديني قايم.. اهدني بقى

= بتعملي إيه يا ساندي؟

- بحفر يا جيمي عايزة أدفن نفسي في الرمل يا بيبي..

= يسمع من بؤك ربنا.. وادفك أنا.

- نعم؟

= مقصدش.. أنا بس مش عايز أتعبك!

- ما تيجي تحفر معايا بالاصفر اللي انت لابسه ده.. بقى أنا أقولك الشيرز الهاواي.. تلبس فائلة الاسماعيلي.. عاملي فيها خلف الدهشوري.. بس تجنن يا جيمي..

= مبقتش عاجبك خلاص!

- من يومك..

= نعم!

- أقصد من يومك عاجبني.. ميس يو دارلنج.. ما تقلع النصارة الشمس خليني أشوف إتجاه عينيك.. مش مريحاني نظراتك يا بيبي..

= انتي بتشكي فيا يا ساندي؟

- إخس عليك يا جيمي.. دي كلمة تتقال بعد العشرة دي كلها واحنا بيننا أربع عيال! أنا عمري ما شكيت إنك تبص لحد غيري.. أنا متأكدة يا بيبي.. آه منك يا فلاني.. زير نساء يا مضروب! أغرفلك طبق محشي؟

= لأ.

- طب ما تيجي نقوم نزل المية..

= والواد اللي على بيرضع على رجلي؟!

- هنادي البت نعناعة تاخد بالها منه.. يا جيمي إحنا عيالنا زي القرش الماسح.. محدش هيعبرهم.. متقلقش..

= لأ انزلي انتي..

- أخاف أنزل لوحدي حد من الشباب بيصلي بصة كده ولا
كده.. وأنا امرأة مُرّة!

= متقلقيش يا روعي.. الشباب اللي هنا مؤدبين ولما بيلاقوا حد
زي أبوهم مش هيبصوا عليه..

- إيه؟!

= قصدي زي أمهم..

- جيمي!

= يا ساندي بهزر معاكي وانتي جامدة اوي كده.. ونضارتك
هتاكل منك حته..

- انت بتعاكس يا جيمي وأنا جنبك.. طب أدعي عليك تنص في
نظرك أكثر ما انت متصوص!

= يا ساندي.. يا ساندي بفرج عن روعي.. شوية من نفسي..
عشان أستمّر في العطاء..

- يا جيمي انت نو عطاء يا ببي.. إن الله حلیم ستار خلي الواحد
ساكت.. أنا قايلة أنزل المية.. هلبط يا جيمي وهاخد تان.. وخليك
انت قاعد كده زي بطرمان المستردة..

غريسيق.. غريسيق.. غريسيق

* يا أستاذ! يا أستاذ!

= أيوة..

*المدام اللي كانت جنب حضرتك غالبًا بتغرق.

= والله؟ طيب كويس.

*هي مش مرات حضرتك؟

= أيوة مراي.. ما أنا عشان كده بقولك كويس..

*بس باينهم خرجوها.. حمد الله على سلامتھا..

= يا خسارة!

- شفت يا جيمي.. مش أنا كنت هفرق بس ولاد الحلال
نجدوني..

= منهم لله.. يلا معلش خيرها في غيرها..

- كده برضه يا بيبى.. والنعمة هتحتاسوا من غيري.. ومين يربي
ناير والعيال؟ هو انت بتعرف تسقي روحك بؤمّة؟!

= تدبّر.. اتكلي انت بس وملكيش دعوة..

- والنعمة من ورا قلبك.. انت بتموت قيا ومداري.. حاسة
بيك.. أهو.. أهو.. باين عليك.. آه منك ومن شقاوتك آآآه..
هاتلي فريسكا يا جيمي.. شكلي بتوحّم.

= يا ولية هتشل!

- متبرش يا جيمي عشان الحاجات دي بتنظر..

يا بتاع الجلايب بكام الواحدة؟

= هالار اسود ع البرود.. عاااااااااا

- أعصابك يا جيمي هيطقلك عرق يا بيبي.. أهيم شوقاً فيك يا
مضروب.

&&&

8

عيد الحب

- ألف هنا وشفا يا جيمي.. مطرح ما يسري يا بيبي.. أعملك
حاجة تاني؟

= الله يهنيكي يا ساندي.. تسلمي.. كوباية شاي بقي يا حبيبي..
وتبقي عملتي اللقطة...

- عيني يا جيمي.. انت قلت يا إيه؟!

= قصدك عشان قلت يا ساندي.. أخدي بالك انتي.. طب بذمة
أهلك انشكحتي صح؟ ها.. قولي قولي..

- إهدا يا جيمي مش هي دي اللي أقصدها.. انت قلت "كوباية
شاي يا إيه؟"...

= يا إيه؟

- إخلص يا جيمي.. قلت يا حبيبي.. ولا انا سمعت غلط؟
= بقى دا برضه كلام.. طبعا سمعتي غلط.
- وانا اللي كنت فرحت.. جات الحزينة تفرح ملقتلهاش
مطرح..

= انتي هتعددي.. يا ساندي ما انتي حبيبي..
- مجد يا جيمي؟!
= إن شا الله أتص في نظري..
- بطل قريح.. ما انت كده كده شيش بيش.. لأ قول إن شا الله
أولع!

= إن شا الله تولعي لو كنت بكذب.

-

= بهزر.. بهزر.. اعملي الشاي بقى..
- ماشي يا جيمي.. صحيح كنت عايزة أسألك سؤال..
= مش هنخلص!
- يا بيبي استنى عليا.. هو بكرة إيه؟
= الأححد..

- كام في الشهر؟

= تقريبا ١٤ ..

= كنت عارف.. بس مدكن! يوم ما الاهلي كسب الزمالك ٦-
١.. صح؟

- اتوكس.. الاهلي كسب الزمالك ٦-١ في شهر ٥ يا
كوتش.. يا ابني حس على دمك وركز.. ورد ودباديب.. هابي إيه؟
= ٥١١١١.. تكونيش تقصدي اللي فـ بالي؟

- اللي هو إيه يا نبيه؟

= الفالتاين! هي دي محتاجة فكاكة.. طب ما تقولي لي على طول
١٤-٢

- أنا بجاتي من الصبح بقول إيه.. مش فراير ده اللي هو ٢؟

= على حسب.. المهم.. ماله الفالتاين.. دا بتاع الكفار..

- طب بقولك إيه يا أبو هب.. مش هتجيلي دبدوب!

= إيه يا ساندي المخ الصغير ده.. الفلوس اللي نضيعها ع
الدباديب والقطط نجيب بيها حاجة مفيدة..

- يا جيمي ورداية واحدة وأصغر دبدوب..

= طب غمضي عينك..

- ما تقولش.. جايلي هدية.. أهو.. استنى عايزة أعد لغاية ٣

وأفتح

= ماشي عدي..

- ١.. ٢.. ٣.. إيه؟

= مش واخدة بالك؟!

- لأ .. إيه؟

= غيرت النظارة بتاعتي...

- يا رب .. يا جيمي تشل وأغيرلك الكرسي المتحرك في

القالنتين الجاي قادر يا كريم!

&&&

9

جنينة الحيوانات

- يا بنتي حرام عليكى أنا شايل الواد وشنطة الأكل، والبنتين متشعطين فى الجاكت.. شيلي معايا حاجة أنا دراعي هيتخلع..
- = يا بيبى كله يهون عشان خاطر الايليفانت..
- الايليفانت! أشوفك مهروسة تحت رجله..
- = بتقول حاجة يا جيمي؟!
- مبقولش..
- = آه يا جبان .. مشاغب طول عمرك يا جيمي..
- طب امسكى الواد خلينى أطلع الفلوس عشان أقطع التذاكر..
- = أوك دارلنچ..

- لو سمحت تذكرتين.

*كل الأورطة دي وتذكرتين اتنين بس؟!

- ما هو حضرتك أنا والمدام ودول عيال صغيرين.

*هات ياخويا اتنين جنييه.

- اتفضل! معلش سؤال..

*نعم!

- إيه إمكانية حجز الست اللي شايلة العيل دي هنا؟

*نعم ياخويا؟!

- والله أليفة.. بس خلي الحارس يقولها ساندي.. وهي مش

هتعض.. صدقي.. بس لو سمعت كلمة فكرية.. يا هوالاااااااا.. حضرتك

عندك عيال؟

*آه.. ليه؟

- أصلك لو قتلها فكرية.. مش هتلق تشوفهم..

*خذ يا بني آدم الباقي واتكل على الله.. كتبكو نيلة في الهباب

اللي بتعاطوه.. انتو فالحين إلا في الهباب والخلفة.. هم إما يبقى

يشيلكم..

= إيه يا ببي كل ده بتجيب التذاكر؟

- على ما الراجل سواهم بقي!

= طب أوعى يكونوا مش مستوين ويجيبولك تلبك يا چيمي
وانت بواسيرك مش مستحمة..

- يا رب يحجزوكي ما تخرجي منها أبداً..

= إن شا الله انت يا چيمي.. بحبك يا مضروب.. استلم العهدة..

- عهدة إيه؟!

= ناير يا بيبي.. من ساعة ما ادتهولي وهو يبص عليك.. بيبك
أوي يا چيمي! على فكرة البامبرزاية في آخر الشنطة.. أصله عملها
العكروت.. غيرله على ما اعمله الرضعة..

- ما تغيريله انتي.. أنا معايا شنطة الأكل..

= ودي تفوتني.. هات شنطة الأكل.. روح بقى غيرله.

= مالك يا بيبي متتح كده ليه؟ چيمي.. انت مُت يا بيبي قبل ما
تغير لناير.. چيمي.. لأ طالما بتنفس تبقى لسه عايش.. إنت مُثل يا
بيبي.. أنا هروح اقعد ع المسطبة دي أغرف للعيال عشان ياكلوا على
ما تيجي..

- متخليش العيال يخلصوا الصلصة والتقلية كلها..

= يا بيبي انت طبقك اسبيشال.. لا تقلق يا چيمي.. بس عايزة
اكتب ستاتس ع الفيسبوك إني في جونية الحيوانات ومبسوطة أكتب
إيد؟

- مبدئيًا.. لو كتبتى جونية على الفيس بوك.. هيقفلوك الحساب
بتاعك.. ثانيًا عايزة إيه مني ما تكتبي أنا متيلة مبسوطه عشان في
جنينة الحيوانات..

= لا يا راجل؟!

- أه والله..

= يا جيمي نفسي تبقى نبيه زي بقية أصحابك اللي في سنك..
انت شاطر يا بيبي.. متخليش حد يبقى أشطر منك عشان ساندي
تحبك!

- طب عايزة مني إيه.. ريحة الواد عمتني..

= والنعمة فرحانة فيك! يا بيبي عايزة أكتبها بالإنجليزي.. وانا
حمارة في الإنجليزية..

- متقوليش كده يا ساندي.. والحمار ذنبه إيه!

= شربات.. بتتقط شربات يا ملزق.. يا بيبي اما مش عارفة
اكتب ساندي إيز فيلينج "إيه" إن ذا زوو..

- اكتبى طيب.. "ساندي إيز فيلينج فاميليار إن ذا زوو" وارسمي
وش بيضحك..

= يعني إيه فاميليار دي؟

- يعني.. يعني.. إمم.. يعني مزأططة!

= يخليك ليا.. تكسب ما تخسر.. قادر يا كريم! روح بقى غير
للواد عشان نضرب الكشري المتين يا أبو شكري..

- أبو أم رومانسيك..

= سمعتك على فكرة.. بتشتم وتجري! والنعمة شكلك كنت من
العيال الغلسة اللي كانت بترن الجرس وتجري ع السلم.. هقفشك..
ومسرك يا ملوخية تيجي تحت المخرطة!

- امسكي الواد بقى شوية..

= هات يا بيبي.. أغرفلك طبق الكشري؟

- ماشي.. العيال فين؟

= تلاقيهم هنا ولا هنا.. الاستاتس عاملة شغل نار.. بتاع ٣٠
لايك يا بيبي.. والكومنتات كلها (هههههه.. هههه.. وش بيضحك..
D:.. مش فاهمة ليه.. أوعى يا جيمي تكون فاميليار دي حاجة كده
ولا كده؟

- عيب يا ساندي.. إنت مش واثقة فيا؟

= لأ يا بيبي.. الكذب خيبة! متخليش أدخل على جوجل
واعرف وساعتها يا بيبي هعملك بوستر..

- بصي الصراحة فاميليار يعني حد حاسس بالألفة وكأن مفيش
غربة.. كأن كل القيود إكسرت.. ومبقاش فيه حدود لمختلف
العوالم.. انصهار في كل شيء...

= حبيبي يا جيمي والنعمة ما فاهمة منك حاجة.. العربي بتاعك
عايز صيانة.. ده عربي مكسر صح؟ انت منين يا جيمي؟

- يعني إيه؟

= بلدكم إيه؟

- انت هتتعرفي عليا من جديد ما انتي عارفة.. من الغربية!

= اه يا عنتيل.. مش بقولك مشاغب.. إسمع أنا عايزة أتصور
بالكاميرا بتاعة الموبايل الجديد..

- تعالي أصورك جنب النسانيس وحطيتها ع الفيسوك واعملني
مسابقة اللي يطلع صورتك يكسب!

= بطل غلاسة بقي يا جيمي وقوم صوري.. طب أقولك حبي
شوية..

- عايزة الصورة بالعرض ولا بالطول!

&&&

10

صبايا سهام سعيد

- شوف مين اللي ع الباب يا شيكو..

* ده بابا.

- شفت بدلعك إزاي يا بُرص.. عشان تعرف إني أحسن منك..
أسمعك بتقول فكرية.. هعملك عصاية مقشدة بشعرك اللي شبه الليفة
البلدي ده.. انت يا واد جايب الشعر ده مين..

* وارثه منك.. انت مش شايفة منظر شعرك.. هقول لأبويا يجوز
واحدة تانية..

- واطي يا واد يا شكري.. عارف تقول كلمة واحدة تانية دي..
هعملك قفصك الصدري ده أو كورديون..

* مش هتعرفي تعميلي حاجة..

- هنشوف.. طب إيه رأيك مفيش الهاي ميل بتاع ماك في نص السنة.. يلا غور على أوزتكم! إنت جيت يا چيمي؟!

= لأ لسه مجتش..

- خراي على دمك.. يلطش يا بيبي..

= طب اعملي حاجة أكلها لحسن..

- "لحسن هيجيلي هبوط أصلي مفطرتش وطول اليوم شاي وقهوة..".. يا بيبي دا الواد ناير حفظها..

= كده برضه يا فكرية.. بتريقي عليا..

- هعد في سري لغاية تلاثة تكون عرفت غلطك وتداركته..

= يووووووه.. بنكشك يا ساندي.. هو الواحد ميتفكش بكلمتين

معاكي..

- اتفك يا بيبي زي ما انت عايز.. يكش تبقى كل قطعة لوحدها.. المهم مسمعكش تقول فكرية عشان أنا غيبة وانت عارفين.. حطالك حرف ال S في السنسلة ليه أنا؟! ها؟! مش نفكر شوية.. قولي بقى النصارة الجديدة فارقة؟

= يعني إيه؟!

- مش شايف اختلاف..

= ااااه فهمت.. شنبرها سوستة.. وبوسع..

- شبرها سوستة وبوسع! انت ناوي تاخذ حد جنبك في
النضارة يا جيمي.. رابع ورا مثلاً؟!

= يا ساندي.. جعان ممكن تأكليني لو سمحتي..

- مش لايق عليك وش الأدب يا جيمي.. أعدمك ما لايق.. انت
مشاغب يا ببي.. بس انت برضه حبيب هارتي.. أركن كده ولا كده
بشبرك اللي بيوسع ده..

- واد يا شيكو.. شيكو.. يا شكريسي..

* إيه..

- تعالى يا حبيب مامي عايزاك!

* بلعب ع الكمبيوتر..

- تعالى عشان مقومش أهيشك.. إنزل هات لبابي علبة كشري
من أم ستة وخليه يزود الثقيلة..

= انتي معملتيش أكل يا ساندي؟

- والنعمة كان في اللبان.. بس عملت شعري أصفر زي سهام
سعيد.. وعمالة أختبر نظرك.. بس واضح إن العيب في المستخدم..

= فين ده الأصفر..

- هاااااااااا اسود.. طب أعمل فيك إيه.. يا ببي أهو أهو!

= خلاص يا ساندي .. شفته .. ما أنا عمال أقول برضه ..

- عمال تقول إيه .. مش بقولك مشاغب وسهْن .. أنا بس اللي حافظاك .. قول يا جيمي قول واطربني ..

= عمال أقول مصروف البيت خلص في إيه .. خلص في إيه؟!
مكنتش متخيل يا ساندي إن التسيب يوصل بيكي لدرجة إنك
تخلصي الفلوس على الصبغات .. ثم مين سهام سعيد دي كمان?!

- إنت مش ندمان انك سألت السؤال ده؟

= نعم؟!!

- إنت عارف أن أي جيمي في الشارع أشرف منك ..

= ساندي! انتي أهبلتي?!

- سوري يا جيمي اندمجت والنعمة .. أصلها بتعمل كده ..

= مين دي?!

- سهام سعيد يا بيبي بتاعة صبايا الخير ..

= بتشتغل إيه يعني؟

- بتشتغلنا ..

= إيه?!

- قصدي بتطلع الجن يا بيبي ..

= بطلي قهرج ..

11

الهدم الشتوي

- يا نعناعة.. حطي التينة في بؤ أخوكي.. مش سامعة عياطه؟!

* حاضر يا ماما.

- قولي مامي يا روجي.

* حننر يا مامي.

- أفوفك عروسة حبيبة.. عايدة نامت؟

* آه.. وشكري بيضربني.

- جاتو ضربة أبو لسان طويل.. أخلص بسر اللي في إيدي

هافضاله.

= بتعملي إيه ساندي فوق الدولاب؟!

- انت جيت يا جيمي.. مش كنت تتصل يا بيبي قبل ما تيجي
عشان الحق أعمل القصة..

= مش هتفرق كثير يا ساندي.. برضه مقولتليش بتعملي إيه
عندك!

- بلعب استغماية يا بيبي.. هتشلني وانت الخسران والنيعمة..
= أنا جيت جنبك.. واحد رجع من شغله لقي مراته واقفة على
كرسي وبتشب ومدخلة راسها في ضرفة الدولاب.. المفروض دا
وضع عادي!

- لأ طبعاً.. عشان الوضع العادي إن حضرتك اللي تبقى مكاني..
عشان أنا إقعد حيلي في تظليع الصيفي وتزيل الشتوي..
= وعلى كده عملي أكل؟

- يا جيمي هو انت كل ما تشوفي متسألنيش إلا السؤال ده..
خليك رومانسي يا بيبي..

= حاضر.. عملي الأكل؟
- طب عندنا فيك.. عملت النهاردة..
= بجد يا فكرية؟!

- أشوف فيك يوم يا جيمي يا ابن عم شكري! بقى يا راجل يوم
ما أتيل أقف واعملك أكل تقولي فكرية!

= من الفرحة مخي اتخول.. معلش يا ساندي.. أصل ده خبر
يخلي الواحد مش على بعضه..

- أنا قلت بقى أرْم عضمك يمكن تخلي عندك دم يا بيبي وتحب
فيا شوية..

= ماب أنا رقبتي وقفت من البصة لفوق.. مش ناوية تتزلي..
- أنزل؟! آه سوري.. نازلة أهو.. خد مني الكيس ده وفضيه ع
السريير..

= هاتي.. يااااه يا ساندي.. فاكرة التونيك ده.. مش ده اللي
جبتھولك من جنينة مول؟

- أيوة اللي "انت" قلت من جنينة مول وطلعت جايه من الزّتون
يا خبيث.. فاكّر يوم ما قفشتك؟ قعدت تقولي جنينة مول.. جنينة
مول وأنا أقول الراجل ده أختلس ولا إيه.. مول ايه اللي هو راح
جواب منه.. وبعدين لقيته طويل وأصريت أروح معاك وانت بترجعه..
وانت تتزلي لأ.. بس على مين! زحت معاك وكان شكلك مسخرة يا
بجيمي وانت رايح ع الزّتون.. وشك يا بيبي كان شبه القوطاية
المفصصة من كتر الحمار..

= انتي قلبك اسود..

- والنعمة بحبك.. دا انا عاملا لك بامية ورز ولحمة.. شفت
الرومانسية.

= شئت آه.. إنجري بقى.. استني استني فاكرة طيب الفستان ده؟
باع عيد ميلادك جبتھولك من رو كسي كان معانا شكري لسه عنده
سنة.. كان سحلية صغيرة على إيدي.. فاكرة؟!

- فاكرة يا بيبي.. يومها أنا عزمتك على شاورما وعصير مانجة من
أبو حيدر.. فاكرا!

= يخرب بيت الذل.. بقالنا عشر سنين بتذليني بالموضوع ده..

- يا جيمي بضحك معاك.. يا بيبي عادي والنعمة.. بنكشك..
أصلك يومها كنت عمال تحلف لتديني الفلوس أول ما تقبض..
تكونش مقبضتش من يومها.. شربات يا جيمي..

= مانا كنت بجهز ونسيت أديهوملك! ويعدين دا موضوع قديم..

- طب ما تجيب الجديد اللي عليك.. ولا انت فاكري نسيت..

= أنا معليش حاجة..

- طول عمرك ضلالي يا جيمي.. يا بيبي انت مش قُلتلي
اشحنيلي ع الهوا بعشرة جنيه.. جالك ولا ماجالكش؟

= جه الشحن آه..

- طب إيه!

= خلاص يا ساندي.. هديلك العشرة جنيه..

- وتمن الشاورما والعصير!؟

= اغرفي الباميا والرز.. وحمري اللحمه..

- أحبك وانت مزنوق يا مهجة القلب...

12

المطبخ

= أيوة يا ساندي.

- ألو أيوة يا بيبي.. حد يرد على حبيبته يقوها أيوة..

= عايزة إيه؟ أنا في الشغل..

- وحشتني يا جيمي..

= زده وقته..

- يا بيبي ما انت لما بتكلمك عفاف بتاعة المشتريات بتبقى حنين

أوي..

= بس إيه اللي بتقوليه ده؟ مدام عفاف دي زميلة..

- طب ما تعتريني زميلة يا بيبي وتكلمني حلو..

= انتي رايقة ومش شايفة القصر...

- "ومش شايفة القرف اللي أنا فيه وكل همك انك تسمعي كلمتين حلوين.. نفسي مرة تحسي باللي انا فيه.." أحبك وانت يوسف وهي.. مثل يا جيمي.. يا بيتي أنا حفظت كل كلامك..

= خلصتي؟!

- لسه... طب خلاص متزوّش.. تحب تاكل ايه؟

= أي حاجة..

- ما انت لسه واكلها امبارح..

= إيه هي دي؟

- اي حاجة، مش كلمتك امبارح وقتلتني برضه أي حاجة.. لازم تغير عشان معدتك..

= بقولك ايه.. متعملش أكل أنا نفسي هقاني على أكلة وعايز أعملها أنا بإيدي..

- حلاوتك يا جيمي وانت شيف.. أراك بالمريلة البمي..

- والنعمة تجن بالمريلة يا جيمي.. ما تيجي اما أغفلك وأصورك قال يعني مش واخد بالك..

= بس يا ساندي خليني اركز.. طريقة عمل الكبدة الاسكندراني يا واد يا جمال.. إممم افكرت.. الملح والفلفل والبصل والخل

وبعدين الكبدة تقطع حتت صغيرة وعليها فلفل أخضر.. طب
الفلفل الأخضر قبل الكبة ولا بعد الكبدة..

- على حسب إنت جاي منين..

= نعم؟

- صدقي.. يعني لو جاي من عبده باشا ونازل ع الدراسة يبقى
الكبدة الأول إنما لو جاي من القلعة...

= بس اسكتي.. خليني اركز..

- ركز يا بيبي.. إلهي يعلي مراتبك..

= يا ولية بس.. هتشل!

- إن شا الله عدوينك.. ومدام عفاف

= عايز لمونة.. وشقيها نصين..

- إتفضل..

.. قرنين فلفل أخضر..

.. إتفضل..

= إزازة الخل..

- إنت هتعمل فيها جراح يا جيمي ما الحاجة كلها عندك..

= طب فين الملح؟

- موجود عندك..

= فين؟ أنا قلبت عليه الدنيا..

- ما هو قدامك أهو في رف الأدوية في العلية اللي مكتوب عليها شاي.

= هتشليني يا ساندي..

- قول يا رب..

= يخرب بيت اليوم اللي قررت فيه إني ادخل المطبخ.. فين الكبد..

..... -

= ساندي.. ساندي.. انتي اطرشتي! فين الكبد؟

- ها؟

= فين الكبد؟

- والنعمة يا ببي كان فيه نص كيلو في الفريزر.. بس شكلي عملتها للعيال وأنا مش واخدة بالي..

= الهي أعدمك..

- حقك يا ببي..

= أشوف فيكي يوم..

- بحب الأربع يا حيمي..

= عا|||.. شوفيلي حاجة أكلها..

- آية كده، إلهي ما تقطعك عادة.. حالاً يا بيبى.. أغرفك

الكبد الإسكندراني اللي بتحبها.. إنت حبيبي يا جيمي.

&&&

13

آلة الزمن

- إيه كمية الكتب والورق اللي قدامك دي يا ساندي؟
= حمد الله ع السلامة يا جيمي يا حبيبي.. دي كتب عن الزمن..
- الزمن! وإيه كمية الأسلاك دي كلها وإيه ده كمان قمع
وجردل ومساحة!!
= يا بيبي أنا بعمل آلة الزمن.. نفسي أرجع لورا يا جيمي..
- بالمساحة والجردل يا ساندي.. هو ده طموحك!
= يا بيبي ده علم إيش فهمك انت في العلم..
- طب وعازمة ترجعي فين؟

= نفسي أعيش في الثلاثينات .. الأربعينات .. أيام زمن الهوانم
بتوع جاردن سیتی كده ..

- طب عملتي أكل ..

= يا بيبی إنت مش شايفني راجعة بالزمن ..

- ترجعي بالزمن .. تطلعي بالزمن أنا عايز أكل .. هخش أغیر
هدومي تكوني اتصرفتي ..

= يا جيمي فيك من الأكل وتعالى ساعدي في آلة الزمن أنا
حاسة إني كنت هليق في الزمن ده ..

- تلاقيني وأنا كمان عندي نفس الإحساس! لا وكمان لو رجعنا
لعصور ما قبل التاريخ والعصر الحجري هتلاقيني نفسك أكثر وأكثر ..

= إتلم يا جيمي .. متخلنیش أعمل فيك زي ما عملت في ناير ..

- وعلمتي إيه في ناير؟! ..

= بلاش يا بيبی عشان هتزعل .. بس وانت بتغيرله هتعرف ..

- هغير هدومي وهنام ساعة تكوني اتصرفتي في الأكل ..

= يا بنتي اظفي النور من فيه كائن متيل نائم في الأوضة .. وإيه
اللي انت عاملاده في شعرك ده؟ انتي مالك قلبتي على ميمي سحيب
كده ليه؟

- باردون .. يا حضرة .. مين حضرتك؟

= ساندي انتي اقبلي؟

- ها ها ها .. حضرتك تقصد فكرية هانم بكل تأكيد ..

= فكرية هانم؟! ايه ضحكة الانسان الآلي دي؟ انتي ركبتى آلة الزمن وأنا نايم؟ أنا جمال .. جيمي يا معتوهة!

- بونسوار يا جمال أفندي!

- بونسوار يا هانم .. انشانيه مدام ..

- تسمحلي أشد على إيدك بحرارة يا جمال أفندي؟

= بكل ممنونية يا فكرية هانم!

- دمك شربات يا جمال أفندي .. لو حضرتك ساكن بعيد عن هنا أنا ممكن أوصلك بالأوتوموبيل بتاعي ..

= لا شكرًا، أنا لما هصحي هاخذ عريقتي وهروح مشوار في التجمع .. لأ تجمع إيه مكش فيه في الأيام دي تجمع .. أقصد عندي مشوار في الصحرا اللي ناحية السويس قبل الكامب الإنجليزي وانتي رايحة ع الكنال كده ..

- فرصة سعيدة إني قابلتك يا جمال أفندي .. إبقى خيلنا نتقابل، أنا بروح التياترو كل خميس .. يا ريت أشوفك .. أورقوار ..

= أورقوار ورحمة الله وبركاته .. إبقى اظفي النور وحية ابوكي يا ساند .. أقصد يا فكرية هانم ..

- ولد يا شكري خلي بالك على مودمازيل نعيمة ومودمازيل عابدة.. على ما اخلص كلام مع جمال أفندي.

*مين الناس اللي انت بتقولي عليهم دول.. وإيه التسريحة الغربية اللي انتي عاملاها دي..

= إخرس يا ولد.. اطلع من بيتي يا كلب!

*انتي كلامك كله هبكرة يا فكرية.. بقولك إيه المستر عايز فلوس الدرس..

- درس إيه يا واد هو لسه الشهر خلص؟

* أه خلص وعايز الفلوس يا إما مش هيدخلني الحصاة الجاية..

- جيمي هات فلوس الدرس بتاعة شكري..

= عينيا يا فكرية هانم .. اتفضلي..

- إيه ده يا جيمي خمسين قرش!

= إبقى بس فكيتها عشان الولد ميمشيش بالمبلغ الكبير ده في الشارع!

- جيمي.. إنت صدقت؟

=

- انت سايبني ورايح فين يا راجل انت؟

= هلبس ونازل.. عندي رانديفو في التياترو.. أشوف وشك على

خير يا فكرية هانم!

- چيمي.. چيمي! يخرب بيت محك يا بيبي.. بس وحياة أُمي تجنن
في جو التلاتينات ده.. چيمي هات فلوس الدرس لا أعضك! إنت
هتستهبل يا راجل انت! چيمي.. چيمي!

&&&

14

الامتحان

- كوابية شاي يا ساندي وحياة أبوكي وساندوتشين..
= عاملة قرنييط.. أحمرلك واحديتين يا بيبي.. تلاقيك يا حبة عيني
على لحم بطنك من الصبح..
- قرنييط إيه بس يا ساندي.. أنا عايز أركز في المذاكرة..
الامتحان خلاص قرب..
= ينجح مقاصدك قادر يا كريم.. والنعمة يا جيمي هتنجح
وتبقى من الأوائل.. وهعمل رز بلبن للشارع كله.. إلا انت في سنة
كام يا بيبي؟
- يا ساندي أنا مش في سنة حاجة.. دي شهادة في المحاسبة
والإدارة.. اسمها سي إم إيه..

= حلاوتك يا جيمي وانت بتمنظر عليا بالانجليزي.. والنعمة
تلايك ما فاهم اللي انت قولته.. بس أنا حاسة يا بيبي إنك هتنجح
في السي بي سي متقلقش..

- سي إم إيه يا ساندي!

= والنعمة حتى لو إم بي سي برضه ناجح.. صدق اللي قال من
جد وجد.. ومن زرع حصد.. واللي يحبنا ميضربش نار عشان جيمي
هيولعها نار..

- طيب ممكن الساندوتشات والشاي عشان ألحق أذاكر..

= إنت في دود في بطنك.. سيب مساحة لمحك يا جيمي..

- جعان يا ساندي!

= من يومك يا بيبي..

- يلا يا ساندي هاتي أكل ومش عايز غلبة..

= انسى...

- نعم؟!

= قصدي انسى إن دبانة تمزب ناحيتك.. اجتهد إنت كده
وركز.. مش عايزة حد ييجب درجات أعلى منك.. عايز درس..
خد!

- إيه يا ساندي اللي بتقوله ده..

= يا بيبى قصدي خد درس ميهمكش الفلوس.. عايز مراجعات
مفيش مشكلة.. كتب خارجية.. ملازم.. تروح ستر.. أنا معاك يا
بيبي..

- كتب خارجية وملازم! هاتي الشاي والأكل..

= واد يا شكري.. مش عايزة دوشة عشان بابا بيذاكر.. وعنده
حاجات بيحلها..

*بيذاكر إيه.. حساب؟

= إم بي سي يا جاهل..

*بابا مش شاطر.. مش بيعرف يحل معايا وبيقولي إسأل المستر..

= بس يا جاموسة.. بابا شاطر وبيجيب عشرة من عشرة.. وسع
كده من وشي خليني أعمله لقمة..

*وأنا عايز أكل..

= همك على بطنك زي اللي خلفك..

*هقوله..

= امشي ياض من هنا لأعضك

= وحية قلبي وأفراحه وهناه في مساءه وصباحه.. ما لقيت في

الدنيا زي الفرحان بنجاحه.. الناجح يرفع إيده.. هيه.. ونغني في

عيدنا وعيده.. هيه.. ونقول ناجحين دائماً..

- إيه الدوشة دي يا فكرية؟

= إلهي تسقط! فكرية مين يا راجل إنت؟! عامللك صانية
ساندوتشات وشوب عصير وأباجورة ع المكتب.. شغل فنادق..
أعملك ايه تاني?!

- مش قصدي يا ساندي.. والله ذلة لسان..

= بموت فيك وانت مبلول.. مشاغب حتى وانت بين أيادي الله..

- بين أيادي الله ايه بس هو انا هموت..

= بعد الشر يا ببي دا عيد ميلادي ع الأبواب .. بعد الهدية ابقى
فلسع..

- بس يا ساندي بلاش هزار عايز أذاكر..

= حبيبي يا جيمي.. ذاكر يا ببي وركز.. أقفلك الباب؟

- يا ريت يا ساندي لو سمحتي..

= يا لهوي عليك وانت مؤدب.. تجنن.. فطيع يا ببي.. جيمي
الكتاب منور يا ببي..

- ربنا يخليكي.. بوجودك يا ساندي..

= بوجودي ايه هو انا جاية اطلب إيد بنتك.. بقولك الكتاب

بينور.. ايه ده! إنت حاطط الموبايل في الكتاب وفاتح الفيسبوك
وتقولي بذاكر..

- داااا.. داااا.. انتي إزاي تبصي في حاجتي?!

= يا ابن الإيه يا شقي.. مش بقولك مشاغب.. يا بيبي عادي..
هو انا همنعك.. براحتك طبعًا..

- طب إيه!

= إيه؟!

- مش هتخرجي.. وتقفلي الباب..

= أخرج وأقفل الباب؟! لأ يا بيبي.. أنا هقعده وأقفل الباب.

- ساندني؟!

= نعم يا جيمي!

- اقعدني يا روجي واقفلي الباب..

&&&

15

الانتخابات

- شايفك مبسوطه أوي ومفرشة..

= هو انتي تكره يا بيبي..

- لأ.. بس اعرف السبب!

= طب ما انت عارف ومتغاض.. يا خبيث يا بيبي.

- وهتغاض ليه!

= عشان اللي عايزاه ينجح.. نجح.. راجل فاهم ومسيطر..

- ناقص كمان تقوليلي إنه جميل ولا وسيم..

= لأ.. أنا مفيش في عيني أوسم منك يا جيمي يا خلبوصتي.. بس

هو مسيطر برضه..

- يا بتقي مش مسألة مسيطر.. القصة إن مركز الشباب محتاج رئيس شاب مش راجل عجوز.. هو ده اللي فارق معايا..

= يعني انتي عاجبك الواد بتاع السلة اللي كان نازل قصاد الكابتن عشري! ده حتة واد فسل ومايع وكل الإنجاز بتاعه إنه متصور مع مايكل جوردان!

- وانتي كمان عرفتي مايكل جوردان!؟

= عيب عليك يا جيمي السؤال ده.. أنا في الفن مقولكش..

- فن إيه؟

= إيه اللي فن إيه! هو مش ده اللي عمل فيلم التين الجنج مع سيلفستر!

- هااااااا اسود.. مايكل جوردان دا أعظم لعب سلة يا معاقة!

= على نفسه يا بيبي.. المهم إن الكابتن عشري نجح..

- إيه إنجازات واحد بكرش زي الكابتن عشري بتاعك عشان ينجح في انتخابات مجلس إدارة مركز الشباب؟

= واخذ ذهبية بطولة الجودو بتاعة دار السلام.. وفضية دورة حلوان.. وال ٣ ع الجمهورية..

- أصلًا بطولة الجمهورية كان فيها ٢ ٤ لاعب بس..

= ما هو كان عنده برد.. بس والنيعمة كان مسجل في البطولة..

- هو فعلاً شكله مُسجّل.. بس أنا برضه مش مقتنع بيه..
والانتخابات أصلاً حرام!

= يا خراي يا جيمي.. النور.. هو النور!

- ماله بس يا ساندي؟

= مفيش يا بيبي.. كان قاطع وجه.. خد هنا أما أقولك.. هو انت
فيك حاجة؟

- حاجة إزاي يعني!

= عيان.. متكهرب.. عندك التهابات.. فيك حاجة مش طبيعية
حاسس بيها؟!

- فكرية.. أوعي فوز عشري ينسيكي نفسك! أنا جمال..

= إنت هتعملي فيها عادل أدهم.. قال أنا جمال قال.. هو أنا
قلتلك إنت علاء.. وبعدين وديني لو قلت فكرية ما هجددلك
اشترك مركز الشباب.. يا بيبي أنا قلقك عليك لما لقيتك مسألتش ع
الأكل.. قلت أكيد إنت اتلبست!

- تصدقي فكرتي.. والله أنا جعان أوي..

= بص يا بيبي.. والنعمة على حسابي هعملك التحليل.. إنت
بطنك فيها ناس تانية عايشين مش ممكن تبقى لوحدة.. يا جيمي إنت
بتاكل ٤ و ٥ طاقات ومبينش عليك.. أنا لما بفكر اعمل كشري
بتخن يا جيمي!

- انتي هتؤي عليا.. أصلك مش شايفة الشقا والغلب اللـ..

= ورحمة عم شكري ما تكمل.. مش عايزة كآبة يا بيبي.. طب
حزر فزر عاملالك أكل إيه؟

- لحمه وفراخ..

= هو انت من الصومال يا بيبي.. مالك عندك صرع ع الأكل
كدا ليه! فكر قبل ما تجاوب..

- لحمه ببصل وخضار سوتيه..

= إنت تعرف يعني إيه خضار سوتيه أصلًا؟!

- لأ.. بس بسمعهم في الأفلام يقولوا كده..

= هو انت أي حاجة تسمعها تقولها.. إفرض كلمة قليلة الأدب..
الناس تقول عليك إيه! ثم يعني إنت متعرفش يعني إيه سوتيه هعرف
أنا! بص يا جيمي إنت فاشل في المسابقات.. أنا عاملة فرخة محمرة
وملوخية..

- بس انا كنت غايز فاصوليا خضرا!!

= واد يا شكري.. علية كشري بستة لبابا وخليه يزود الشطة..

&&&

16

القراءة

- ساندي.. ساندي.. سانديسي...

= أفندم!

- سلامٌ قولاً من رب رحيم.. إنتي مين؟!

= هكون مين يعني.. أنا مراتك يا جمال!

- جمال!

= مالك ارتسمت على وجهك علامات الدهشة كده ليه؟!

- ارتسمت على وجهك!! ساناي انتي بتكلمي كده ليه؟ وإيه

اللي انتي عاملاه في نفسك ده؟!

= مالي شايفني بنونو زي الققط ولا متشعبطة في غصن شجرة

يائعة..

- يانعة!! كبيرة على محك دي يا ساندي..

= بتقول حاجة حضرتك؟

- لأ مبقولش.. بس أصل أول مرة أشوفك عاملة ديل حصان
وتوكة وقافلة الزرار اللي فوق.. وإيه النظارة دي.. شكلك
مسخرة.

= جهل وسطحية..

- اللهم طولك يا روح..

= كلمات بلدي.. تدل على فجوة سحيقة بين المتكلم والمستمع
وعن مدى التدني في الذوق العام..

- طب وربنا انتي ما فاهمة حاجة من اللي بتقوله! وبعدين خدي
هنا.. إيه اللي في إيدك ده؟

= دي رواية البؤساء للعالمي فيكتور هوجو..

- يا جامد انت.. لأ ومج وحركات..

= لزوم العمق يا أستاذ..

- يا عميقة.. بير يا اخواني.. وإيه اللي مكتوب ع المج ده؟ وربني
كده "إسماعيل أند بي هاي" .. حلوة أوي..

= أكيد..

- إيه هو اللي أكيد.. انتي عارفة يعني إيه أصلًا؟!

= والنعمة يا جيمي ما عارفة ومقهورة.. وكنت لسه هخش على
جوجل ترانسليت..

- يعني ابتسمي..

= أيوة خلاص الفكترت.. إبتسمي إنتي في مصر..

- هو أي كلام وخلاص.. إبتسمي وكوني سعيدة..

= صح..

- لا يا شيخة.. المهم شفتي الكتيب ده لقيته مع إزاة الزيت في
المطبخ..

= كتيب إيه يا بيبي؟

- وصفات أكل وكده.. بصي شكل الفرخة يفرح إزاي.. ولا
الرز.. فطيع يا ساندي..

= جيمي.. إقرا يا بيبي عشان تنشط المخ والذاكرة.. القراية غذاء
الروح!

- أيوة يا ساندي بس برضه الفراخ غذاء المعدة..

= يا جيمي هتشلني.. بمحاول أتنقفلك عشان أبقي مُرّة في نظرك!

- بديل الحصان والزرار المقنزل.. يبقى موضوع مُرّة ده تنسيه
خالص..

= طب عايزني أعمل إيه؟!

- وهتعلمي؟

= بيبي.. أنا شعاري.. وعدنا فأوفينا..

- يا ساندي هو انا بكلم معمار المرشدي؟! أنا عايز كلام جد..

= ورحمة أمي هعملك اللي إنت عايزه..

- نفسي في مكرونة فرن وفراخ بانيه..

= وتفتكر لو عملتهم هبقى مُزّة يا جيمي؟

- إيه؟!!

= متعملش فيها شفيق.. يا جيمي.. يا جيمي والنعمة أنا بدأ

يجيلي بواذر شلل منك ومن معدتك..

- بعد الشر عليكى.. ومين اللي هيحمر البانيه..

= إلهي أشوفك بتحمر في الزيت وما يلحقوا يتيلوك قادر يا

كريم!

&&&

17

سانتا كلوز

- جيمي.. يا جيمي.. يا جيمي..
- = إيسيه؟! عايز أنا.. حد يصحي حد كده..
- قوم بقى يا بيبى.. وحياتي وحياتي.. يا رب تتشل لو مقومتش..
- = بعد الشر عليا.. إيه اللي انتي لابساه ده طرطور؟!
- يا بيبى "هابي نيو بير".. عاملالك سانتا كلوز.. يجعل ٢٠١٥
- سنة بيضة ع الكريم سودة ع اللنيم قادر يا كريم..
- = هابي نيو بير يا ساندي.. إطفى النور بقى..
- نو يا بيبى.. قوم بقى عشان عايزة اكلمك في موضوع مهم..
- = تفتكري إيه ممكن يكون مهم الساعة ٢ الصبح..

- يوووه.. حاجات كتير.. يا بيجي هو انا بقعد معاك.. انت
بتيجي متسرع ع الأكل.. تاكل وتفضل مبجلق في الفيسبوك لغاية ما
تنام والتليفون يقع من إيدك..

= إتيلنا قومنا.. إيه بقى الموضوع المهم اللي انتي عايزاه؟!

- هو مين سانتا كلوز ده؟

= انتي بتتكلمي جد يا ساندي؟

- أه والنعمة.. هي حاجة قبيحة!

= لأ مش قبيحة.. بس أصل.. يعني.. هالار اسود أومال انتي
بتقوليلي عاملالك سانتا كلوز إزاي؟

- لقيت الواد شكري لاييس الطرطور الأحمر وبيقولي أنا سانتا
كلوز.. رحى واخدهاه منه وقلت أما أخش بيه على أبو شكري
حبيبي.. قولى بقى مين؟!

= هو مين؟

- سانتا كلوز..

= إمم.. بصي يا عبقرية زمانك.. سانتا كلوز ده بقى يبقى بابا
نويل..

- قول والنعمة!

= أه والنعمة..

- طب وليه التكديرة دي؟

= لأ عادي.. هو اسمه برة كده..

- هو بابا نويل ده بيعمل إيه؟

= انتي مدياني إحساس إنك جايالنا من المريخ.. معقولة يا ساندي
طول العمر ده ومش عارفة بابا نويل بيعمل إيه؟

- لأ.. بس أسمع إنه حد كويس..

= هو فعلاً حد كويس.. يا ساندي بابا نويل بيعطي للناس في أول
السنة يحقق أمنياتهم.. إلا انتي لو جالك بابا نويل هتطلبي منه إيه؟

- هو انا ليا كام طلب؟

= هو انتي طالعلك عفريت من الفانوس!؟

- يا جيمي بالراحة.. بص.. أنا هخليه الأول يلم الغسيل ويجوز
الشرايات.. ويرمي السجاجيد ع الحبل في البلكونة عشان أنفضهم
بالمضرب.. ويغير الملايات.. وينقض الغسيل الأبيض من الألوان..
بس..

=

- ساكت ليه يا بيبي!؟

= عشان هتشل.. إنتي عايزة بابا نويل يلم الغسيل ويجوز
الشرايات.. إنتي فاكراه أم هاني مرات البواب!؟

- لو كتير عليه ممكن نقسم الشغل أنا وهو..

= يا قلبك الرهيف.. يا بنتي فكري.. بابا نويل ها بابا نويل..
بتاع أول السنة.. هتطلبي إيه؟

- واحد بيعج ماك ويز تشيز.. وبطاطس لارج..

= يعني إيه ويز تشيز يا ساندي؟

- متبقاش رخم بقي.. يعني هعرف وهخبي عليك..

= يا بنتي متشلينيش.. مصحياي الساعة ٢ ولا بسطة طرطور ومش
عارفة مين بابا نويل ولا عارفة لوجه هتطلبي إيه.. أعمل معاكي إيه!

- طب اعتبرني أنا بابا نويل.. شيك لبيك تطلب إيه.. غير
الأكل؟

= إنتي ليه مش قادرة تفهمي إن بابا نويل ده حد بدقن وطرطور
أحمر.. مش راجل أقرع وعريان طالع من الفانوس!

- اطلب بقي..

= إطفئ النور طيب.

- انت فهمتي غلط يا شقي..

= إطفئ النور واطلعي برة عايز أنا!!!!!!ام!

&&&

18

عيد الميلاد

- عايز الصدر ولا الورك يا بيبي؟
= ما انتي عارفة يا ساندي.. مباكلكش غير الدبوس..
- مطرح ما يسري يمري يا جيمي.. خد الصدر كمان يا بيبي..
= لأ مش قادر يا ساندي..
- وحياتي.. طب أغرفلك شوية محشي..
= لا كده تمام..
- على ما تغسل إيدك أكون عملتلك أحلى كوباية شاي لأجمل
جيمي فيكي يا دار السلام..
= هو أنا ليه مش مرتاح يا ساندي؟

- ليه يا جيمي كفافا الشر.. حد داسلك على طرف يا بيبي؟
 = لأ.. بس حاسس إن فيه حاجة غلط..
- ربنا ما يجيب غلط يا أبو شكري.. مالك؟
 = انتي اللي مالك.. تالت يوم تعملي أكل وتجييلي الشاي..
 والعيال نائمة والدنيا هادية..
- لأ يا جيمي.. أوعى تكون فهمت اللي فـ بالك.. انت أخ ...
 = إنجزي.. فيكي إيه؟!
- طاعة الزوج واجبة يا بيبي خصوصًا واحنا داخلين على شهر
 ٤.
- = ماله شهر ؟؟
- هتشلني قريب بس بجبك أعمل إيه! حاسة إني هموت ناقصة
 وزن بسبك..
- = أنا جيت جنبك..
- حد قالك متجيش.. والنعمة نفسي تيجي.. ما علينا.. وأنا
 بتصفح النت..
- = بتصفحني النت! مش واسعة شوية..
- متبقاش رخم يا جيني.. والنعمة كنت بتصفحه.. المهم لقيت
 الذهب نزل..
- = وده إيه علاقته يانك تعملي أكل ثلاث أيام ورا بعض؟!

- سيبك من الأكل وركز شوية معايا.. فاكّر منال اللي كانت ساكنة قدام ماما الله يرحمها.. جوزها لما اتفرد منفعمش إلا حتتين الذهب اللي حيلتها.. ولا جومانة أول ما جوزها إتشل.. على طول جريت وباعت الذهب وقالتله إنا وانت واحد يا جوزي..

= انتي تعرفي واحدة اسمها جومانة؟!

- الكذب خيبة يا جيمي.. عمري ما عرفت حد بالاسم ده.. بس حاسة لو كنت عرفت كانت هتعمل كده..

= انتي عايزة إيه يا ساندي من غير لف ودوران؟

- انزل يا جميل في الساحة.. واتمختر كده بالراحة..

= انتي متخيلة إن صوتك حلو مثلاً..

- طب حيوا أبو الفصاد.. مين أبو الفصاد ده يا جيمي؟

= أنا عارف! أهو حد بيعجبه سيرته في أعياد الميلاد.. أنا إيش

عرفني بقي!

- أحبك وانت لماح.. نركز شوية بقي مع بعض.. شهر [?] وأعياد

الميلاد.. ذهب.. وسعره بيتزل.. ها!

= أنا ليه حاسس إنك بتعامليني على إني فاقد الذاكرة وانتي

بترجعيها لي؟!!

- يا جيمي.. نفسي أحس إنك بتلقطها وهي طيارة..

= لعلمك بقي أنا فاهم كل حاجة.. بس مذكّن..

- يا واد يا حويط..

= أو مال.. إنت فاكرة ايه!

- وفهمت إيه يا أذكى إخوانك..

= إن الذهب بيرخص في شهر ٤.

- طب أدعي عليك يايه؟! يا بيبي هتشلني والنعمة.. عمالة
أغنيلك إنزل يا جميل في الساحة وأقولك أبو الفصاد.. عشان تقولي
الذهب بيتزل في شهر ٤.. وتقولي مدكن!

= أو عي تقولي إن تخميني طلع غلط!

- إنت بتسمي ده تخمين.. ده تفكير واحد مخه تخين..

= عيب يا ساندي..

- إنت خليت فيها ساندي.. يا جيمي.. افهم يا بيبي.. أنا نفسي
في غويشتين ذهب تجيبهوملي هدية في عيد ميلادي اللي جاي.. بس
من غير ما اعرف والنهي.. وتبقى تعملها لي مفاجأة..

= مفاجأة إزاي ما انت هتبقى عارفة..

- أعرف منين! إن شا الله أعدمك لو خليت حد قالي..

= قوليلي يا ساندي.. لو اترفدت أو إتشليت.. هتبقى أصيلة
وتيعي الذهب؟!

- إخس عليك يا جيمي.. أولًا ألف بعد الشر عليك يا بيبي..

= وثانيًا؟

- ألف بعد الشر عليك يا بيبي..

= وبعدين..

- أوامر!

= اللهم طولك يا روح.. لو حصلي حاجة هتعملي إيه..

- ألف بعد الشر عليك يا بيبي..

= هتشليني..

- لأ متفقدناش على كده.. مش لما يجي شهر ء وتجب الذهب..

&&&

19

المذاكرة

- إيه الدوشة دي.. أنا لسه منيمة ناير.. والنعمة لو صحته هديكو حنة علقة بالشيشب..

* شكري عمال ياخذ مني الحصالة..

** كدابة.. هي اللي عمالة تقولي خد الحصالة وهات الصفارة..

- حصالة إيه وصفارة إيه هتشلونى.. امتحانات الترم كمان ثلاث ايام وانتو قاعدين تلعبوا.. يا جيمي.. يا جيمي.. تعالى شوف ولادك..

= أيوة يا ساندي أنا في الصالة.. أجي أشوفهم ليه مانا عارفهم..

- يا بيبى هو أنا بقولك تعالى أتعرف عليهم.. إنت بتعمل إيه عندك؟

= بشوف حاجة مهمة ع الموبايل..

- حاجة إيه؟ انا حسي اتنبح!

= شوية وجاي..

- طلعتي كتب الحساب انت وهي.. وانت يا عايدة روحي

افتحي الكارتون يا حبيبة مامي.. شطورة..

** إيه الحساب ده؟

- اللي هو الماث.. قطعت مدارس اللغات! طلع يا زفت المنقلة

وقيس الزوايا اللي قدامك..

* فوريّ فايف.

- فوريّ فايف عفريت لما يبقوا يركبوك.. ما الزاوية منفرجة أهى

يا بغل..

* يعني إيه منفرجة.. مش بفهم عربي..

- يعني غلط.. قيسها تاني..

* وكتاب الله فوريّ فايف!

- يا واد هتشل.. ما هي مفتوحة قدام عينيك أهى زي بؤ أبوك..

ناولني التليفون لما اشوف مين باعت ع الواتساب دلوقتي..

(رسالة من جيمي: نفسي في فيشار ولقمة القاضي)

- طب أنا أتشل ولا استنى.. قولولي إنتو.. أبوكو هيشلني.. قيس
ياض الزاوية عدل وبص ع الأرقام السوداء مش الحمرا.. وانتي
طلعلي كتاب الانجليزي.. على ما أجي من المطبخ!

= ساندي.. ساندي..

- نعم يا بيبي..

= عايز الفيشار بشوية بالملح وشوية بالكراويل..

= مالك يا ساندي متتحة كده ليه؟

- هي عقوبة القتل الخطأ قد إيه؟

= من ثلاث لسبع سنين..

- قول ثلاثة يعني ٢٠١٥، ٢٠١٦، ٢٠١٧.. كويس هطلع
قبل كاس العالم بسنة..

= بتقولي إيه؟! مش سامع.. ها.. بتقولي إيه؟!

- يجرب بيت سربعتك.. أديك لعبطني.. خليني أحط ملح بدل
سم الفيران!

= إنت عايزة تسميني يا ساندي؟

- تصدق إتأثرت..

= طب خلصي الفيشار وهاتيه ع الصالة عشان في إيدي حاجة
مهمة..

- إنت مالك متسريع ليه ما تقف معايا شوية..

= هخلص اللي في إيدي وابقى معاكي..

- اللي هو إيه اللي في إيدك يا بيبي؟!

= كاندي كراش..

- هو أنا خلصت من صَب واي ألاقك دخلت في كاندي

كراش! يا جيمي إنت جاي تعيش طفولتك معايا؟!

= مش هطول.. هخلص على طول وابقى معاكي..

- إلهي تكفي على وشك وانت ماشي.. تقوم تتعدل تلاقي الباقية

خلصت.. تجدها يقوم موبايلك يقع في قاعدة الحمام!

*مامي.. طلعت كتاب الإنجليش.

- أشوفك سفيرة..

*يعني إيه سفيرة؟

- مش مهم.. هاتي يا حبيبي الكتاب.. قوليلي يا نعاة..

money بتاخذ much ولا many؟

**many عشان الفلوس بتتعد..

- بس يا أهطل.. قلولي يا روجي؟

*مش عارفة

- much يا حبيبي عشان الفلوس مش بتتعد..

* لأ بتتعد يا مامي.. إنتي طول اليوم بتعدي الفلوس اللي بتاخديها
من جيب بابا وهو نايم..

- ششششششش.. بس يا بت انتي هتفضحيني.. شايقة ده إيه؟

* آه.. ده شبشب حضرتك الأخضر أبو فيونكا..

- أهو بشبشب حضرتي الأخضر أبو فيونكا ده هخليكي تعرفي
إن الفلوس مبتعدهش.. ها إخلصي.. بتاخد إيه؟

* بتاخد much عشان الفلوس اللي بتاخديها من جيب بابا وهو
نايم مش بتتعد!

- يخرب بيت مخك هتودينا في مصيبة.. مفيش جيب بابا..

* ماشي.

- شطورة حبيبة مامي.. أشوفك عروسة..

** جعان..

- إنت هتجيبه من برة.. قوم هات الفينو والمربي والجبنة من
التلاجة..

** لأ أنا عايز فراخ..

- قوم ياض.. فراخ اما تبقى تلهفك..

* مامي ممكن أروح التواليت..

- روحي ..

** عاوز أشرب ..

- روح اتنيل..

* مامي عيني بتوجعني..

- معلش يا روحي!

** ضوفر رجلي الصغير بيشكني..

- جك شكة في قلبك..

* مامي شكري طلعلني لسانه ..

- بس يا زفت. .

** هي بتبرقلي بعينها. . .

- بس يا زفتة. . .

= ساندي.. كوباية شاي..

- يخرب بيت بطنك اللي مبتهمدش!

= بتقولي إيه؟

- بقولك عيني يا بيبي..

= إيه ده إنت فاتحة الباب ورايحة فين بصينية الشاي والبيجاما..

- آه سوري.. امسك كده صينية الشاي.. أنا سايلك البيت..

عمالك عندك.. شايك في إيدك.. تصبحوا على خير..

= استني هنا يا مجنونة رايحة فين بالبيجاما وشبشب بفيونكا؟!

- لا أبداً.. عندي حفلة تنكرية! أنا إتشليت منك يا جيمي انت والعيال.. نازلة امشي في الشارع وهكتب ع الفيسبوك فيلينج لوست..

= خوشي يا ساندي طبعاً مش هتترلی..

- يا حبيبي يا جيمي للدرجة دي يا بيبي مش قادر على بعدي..
كنت متأكدة إنك متقدرش تعيش من غيري..

= إيه الجو الهابط ده.. أولًا انتي لابسـة الشيشب فردة وفردة
الناس هتقول عليكـي مجنونة.. ثانيًا ناير بيعيط غالبًا عايز يغير.. خشي
غير يله..

- أنا غايرة في داهية.. وهزل حافية.. عشان محدش يقول عليا
مجنونة!

= طب فين لقمة القاضي؟!

- عا -

&&&

20

المصروف

- چيمي .. چيمي ..

= نعم ..

- بيبي ..

= ايه؟

- اسمها نعم يا بيبي ..

= اللهم طولك يا روح .. عايزة ايه ع الصبح؟

- بناغشك يا چيمي .. مش لازم تقفش يا بيبي .. وفكها كده

وخليك فريش ..

= أنا متأخر ومش عايز اليوم يتخصملي ..

- الشريرة وبعيد يا ببي.. تعالى هنا أما أقولك.. إيه الحلوة
دي؟! قمر يا اخواني!

= بمجد عجبك القميص؟

- يحبل.. لأ كمان مع الحزام والجزمة.. شغل فنادق صحيح..

= الساعة عاملة شغل.. مش كده؟

- مقولكش.. كمان مع النظارة.. ولا الأجنب..

= انتي بتشتغليني يا ساندي.. أجانب إيه بس؟

- والنعمة أجانب.. ياكش الحظ بس..

= يلا الحمد لله.. مش عايزة حاجة قبل ما انزل؟

- إخس عليك طبعاً عايزة..

= تصدقي بالله.. أنا كنت حاسس.. أنا عارفك وعارف

دماغك... أصل شغل إيه الحلوة دي، ويا اخواني، وفنادق،

وأجانب.. كل ده أكيد مش ببلاش.. إنجزي عايزة إيه؟

- ورقة بمتين لأول الشهر..

= إيه! ميتين جنيه!

- هات مية طاه..

= ميت عفريت لما ينططوكي..

- هات خمسين طاه..

= انتي بتفاصيلي.. لحق المصروف يخلص..

- والنعمة خلص من خمستيام.. وأنا ماشية بالقصور الذاتي..

= يعني إيه قصور ذاتي؟!

- انت ما بتصدق تمسك في الكلمة.. خلينا في موضوعنا.. أنا
معيش ولا مليم..

= المصروف راح فييين يا سااااندي؟

- متعملش فيها يوسف الضو في المال والبنون.. كل حاجة
غلتي يا جيمي.. أنا بترل لباع الخضار بالخمسين جنيه أرجع من غير
ولا مليم، وكمان راهنة الواد شكري.. أنا فاضلي كيلو قلقاس
واكتب نعانة بيع وشرا لعم عاطف بتاع الخضار..

= يا ساندي أنا اللي بدفع الإيجار والمية والكهربا وبجيب اللحم
والأدوية والبايرز والفينو كل ليلة.. وديتي المصروف فين؟!

- بتخونني يا جيمي؟! والنعمة ما بجيب باكو لبان شكلس
لنفسى.. والحمد لله إن أمي ميتة كنت قلت بديها الفلوس..

= يا دي الليلة اللي مش معدية.. ما تسيبك من جو الصعابيات
ده.. فين فلوس المصروف؟!

- هي أغنية.. فين فلوس المصروف فين فلوس المصروف.. إمسك
انت المصروف يا جيمي.. أنا أصلًا مبقتش حمل لا مرواح ولا محي..
أنا كفايا عليا العيال وقرفهم..

= وأنا وقرفي.. مش كده؟!

- إنت اللي قلت مش أنا.. ربعدين أنا جسمي كله واجعني من
الطلوع والتروول.. وشيل الحاجة..

= دلوقتي جسمك وجعك.. ما انتي بتبقي فرقلوز وانتي بتشتري
لبسك وجزمك ولا عفريت العلبة.. تخرجي من الحل ده تخشي الحل
ده، ومن الدور ده للدور ده.. بتاخدي السوق رايح جاي ولا كإنك
أبو تريكة..

- أه يا أهلاوي يا شقي.. بكرة مرتضى يطلعلك سيديهاك..
بس والنعمة شربات وانت بترقص.. تقولش تحبة كاريوخا.. سيب
خمين بقي وخليك جدع..

= خدي.. يكش بتمر..

- ياخذ عدوينك.. متنساش الفينو واللبن وانت جاي..

= حسبي الله..

- والبامبرز لحسن آخر بامبرزية اللي في الكيس..

= حسبي الله..

- لو لقيت أوستافاندي حلو هات اتنين كيلو وانت جاي..

= حسبي الله..

- الواد شكري عنده امتحان ماس بكرة وعاييز منقلة ومثلث..
مش مهم تجيب هو جاموسة أصلًا ومش هيفلح وأنا خايفة على
قرشك يا بيبي..

= يا حنيئة..

- عشت يا أبو شكري.. بس الكوتشي بتاعه إتقطع.. إن شا الله
تجيب واحد من التوحيد والنور.. هو رجليه مفلطحة ميتخيرش عنك
يا جيمي.. هاتله ٣٩ وخليه يتوصى.

= حسبي الله..

- محمد رسول الله يا بيبي.

&&&

21

الإلهام

- يا موبايلا تـك يا جـمـي .. مفـيـش إـتـفـضـلـم ! مـيـفـلاـش عـلـيـكـي .. أـي
حـاـجـة كـدـه ..

= انـتـي هـتـنـوـي يا سـانـدي .. أنا لـقـيت عـرض بـالقـسـط .. دـفـعت
الـمـقـدم وـجـبـتـه ..

- ودي حـتـة سـامـسـونـجـا ولا صـيـني؟

= انـتـي بـتـروـحـي فـيـن وانا فـي الشـغـل؟ إـيـه حـتـة سـامـسـونـجـا دـي!

- بـداعـبـك يا جـيـمـي ..

= طـيـب مـبـدئـيـا كـل الـتـلـفـونـات صـيـني .. وده إـيـتـش يـي سـي ..

- الله عـلـيـك فـي الإنـجـليـشـة .. ولا تـوـنـي بـلـيـر ..

- = والله وعرفنا توني بلير .. الفيسوك غيرك ..
- يا بيبى أنا حافظة كل لعبة تشيلسي .. مش توني بس ..
- = إنتي متخيلة ان توني بلير يلعب في تشيلسي؟!
- متقولش إنه جاله عرض فـ جالطا سراي؟
- = إلهي يجييك إنتي جلطة وأخلص منك! توني بلير كان رئيس وزراء إنجلترا ..
- والنعمة ولا قالي .. بس وريني كده التليفون .. والله وبقي معانا سمارت فون يا جيمي ...
- = بقى عارفة "سمارت فون" ومش عارفة توني بلير!
- يا عم هو جوز خالتك .. فرجني بس ع الموبايل الإل بي سي اللي انت ماسكه ده ..
- = اسمه إيتش تي سي .. امسكي .. بس عارفة لو هنج!
- يهنج إيه انت فاكره زيك .. هات بس هات .. أوبالال إديني في الأوبشنات يا جيمي .. هالالار اسود!! إيه ده خد هنا ..
- = إيه في إيه؟
- مين سهام السخنة اللي بترن ذي؟!
- = إهدي بس وبطلني غباوة .. دي مدام سهام اللي عندها شاليه في العين السخنة ..
- ومسجلها سهام السخنة؟!

= عادي يعني.. عشان أعلمها..

- طبعاً عايز تعلمها.. ومين دي كمان؟! أنا هموت دأوقتي.. أهو بموت.. منك لله يا خاين!

= فيه إيه تاني؟ إلهي يخرّب بيت شيطانك..

- مين سماح أوضة نوم دي كمان؟!

= آآآه.. دي مدام سماح اللي كانت عارضة أوضة نوم للبيع في الوسيط.. فأكرة اللي كنت هشتريها لحسين اخويا.. كلمتني تقولي إن الاوضة متباعتش..

-

= مالك بتبصي كده ليه؟!

- المفروض إني أصدق إن سهام السخنة وسماح أوضة نوم دي اتصالات برينة؟!

= طبعاً يا ساندي.. إنني أهبلقي؟ ما انتي حاطة على تليفونك عادل أنبوبة وسيد توكتوك وعاطف قلقاس وسميرة طلبات.. إلا مين سميرة طلبات دي؟ ها؟!

- انت..الك.. ماشي يا عم البريء.. أما أشوف آخرتاً معاك.. المهم.. انت جيت حتة سمارت.. ملكش حجة.. أشوف لايكاتك من هنا ورايح على كتاباتي..

= كتاباتك؟! اللي هي ايه بقى يا ست الكاتبة العظيمة؟

- بطل تستهين بموهبتي .. خش وشوف ..

= هاتي طب التليفون كده .. أوباننا .. إنتي مجد اللي كاتبة الكلام
.. ده

- أو مال مامي الله يرحمها؟

= بغض النظر عن "مامي" اللي جت غلط في بؤك بس الكلام
تحفة ..

- دا أقل حاجة يا جيمي .. "الإلهام" بيعجي واكتب على طول ..

= إذا كان كده .. إديني مستني معاك .. أشوفك وانتي بتكتبي ..

- لأ مستني إيه .. قوم هنا ولا هنا خليني اكتب ..

= خليني معاك يا ساندي .. عايز أشوفك والإلهام نازل عليك ..
أنا مجد فخور بيكي ..

- طب ما تخش تفخر في الليفينج ..

= نو ..

- نو .. إممم .. طب ما تيجي كده ولا كده عشان الإلهام مش
واخد ان يبقى فيه حد معايا وهو جاي ..

= أكيد لأ طبعا .. دي لحظة تاريخية ونقطة فارقة في حياتنا ..

- وماله ..

= هانا أنا بقالي ساعتين مفيش حاجة .. إيه !

- الغايب حجته معاه يا بيبي.. تلاقيه تاه في دار السلام.. ولا
التوكتوك مش معاه فكة..

= توكتوك إيه وهباب إيه.. هو انتي حتى الإلهام بتاعك مكحوت
زيك! استني أما اشوف مين اللي بيرن!

= ألو.. أيوة يا حسين.. إزيك يا أخويا.. إيه مالك في إيه؟ إهدى
بس..

.....*

= آه قدامي أهيه.. بتقول إيه؟! بتاخذ بوستات مراتك وتحطها
عندها.. من غير كلمة "كوبيد"..

.....*

= لأ ميصحش طبعاً.. متزعلش.. حقك عليا.. حاضر هقوها
تكتب منقول.. سلام.

- حسين فتن.. صح؟ بيكذب.. آه والنعمة.. هو ومراته
بيكذبوا.. إيه بتبصلي كده ليه..

= ساعتين مستني الإلهام.. وتعالى كده ولا كده.. الإلهام سن
واخد إن فيه حد معايا.. أتاري إلهام قاعدة مع مرات حسين أخويا يا
ضايعة!! بتسرقي بوستات الست!؟

- والنعمة بحط التاتشاية بتاعتي.. بس هي مش بتاخذ بالها..

= حطوكي في نعش يا بعيدة.. هتشليني..

- الشريرة وبعيد يا ببي.. شوية والإلهام يجي واكتبك حاجة
أفرفشك بيها، بس هي تحط البوست بتاعها.

&&&

22

السينما

- جيمي.. عازية أقعد لوج.

= انتي آخر مرة شفقي فيها سينما كان إمتى؟!.

- من سنة يا بيبي.. دخلت حلالة روح..

= بغض النظر عن سبب دخولك "انتي" فيلم لهيفاء وهي.. ممكن
تقوليلي قعدتي لوج ولا بلاكون؟

- إيه اللي بتقوله ده يا بيبي.. بقينا في ٢٠١٥ وتقولي لوج
وبلكون.. يا جيمي إحنا في عصر الإنترنت..

= هتيتمي عيالك بدري باللي بتعمله فيا..

- بموت فيك وانت مهنج.. يا بيبي والنيممة بناغشك..

- = طب امسكي ناير على ما اروح أقطع التذاكر..
- هات.. مش كنت سمعت الكلام وسبنا العيال عند الست
الوالدة بدل المرمطة اللي احنا فيها!
- = ماما تعبانة ومش حمل قعدة بأربع شياطين..
- وبالنسبة لمرات اخوك اللي بتسيب أورطة عيال مع امك..
- = أمك؟!
- قصدي طنط..
- = يالا يا ساندي هنتأخر..
- طب روح يا عم المستعجل..
- = مساء الخير.. من فضلك عايز ؟ تذاكر فيلم إنترستيلر..
- # أهلا يا سيدي.. ؟ تذاكر إيه؟!
- = فيلم إنترستيلر..
- # لحضرتك؟
- = أيوة ليه؟
- # دي المدام؟
- = أيوة.. مفهمتش برضه ليه؟
- # ده فيلم أجنبي..
- = أه مانا عارف..

الفيلم خيال علمي وعن الفضاء وكده..

= غالبًا قرئت حاجة زي كده..

مفيهوش مناظر ولا الشغل اللي انت داخل انت وهي

عشانه..

= لأ حضرتك فهمتنا غلط.. دي مراي مش واحدة شاقطها من

جامعة الدول.. واللي بييجروا ورا بعض هناك دول ولادي.. الأطفال

اللي هناك دول ..

انت بتسمي المخلوقات العجيبة اللي بتجري دي أطفال..

إمسك.. منكم لله خربتوا المنظومة..

= متشكر أوي..

- إنت رغاوي على طول كده يا جيمي.. إمسك الواد على ما

طلع البامبرزاية.. شكله ثقل في الأكل..

= ما تغريله انتي على ما احجز الكراسي..

- بلدي أوي الحركات دي يا بيبى.. هو انت داخل مدرج تجارة

الزقازيق تقولي هحجز.. خد ناير غيرله..

= حاضر..

- وهاتلنا فيشار.. ملح بس..

= حاضر..

- متجيش مية.. أنا جاية إزازة متلجة معايا..

= يا سلام! هو ده بس اللي فاكراه..

- يا بيبي والنعمة ببحك..

= طب سكتي ناير صوته عالي أوي..

- حبيبي شكله عنده تقلصات.. أنا مكنتش لازم أثقله في شورية الكوارع..

= إيه؟!!

- والنعمة قرئت ع انت إنها مفيدة.

= للأطفال؟!!

- الكذب خيبة.. مقالوش!

** يا جماعة اللي معاه عيل صغير يعمله سايلنت..

= سكتي الواد إتفضحنا..

- حاضر هعمله ريستارت.. إنت ليه محسني إنا معايا عيل

نوكيا ٩٠٩.. إنت مراهق يا جيمي؟!!

= إيه الكلام ده؟

- لا إله إلا الله.. طب إنت شايف إن ده مكان مناسب للي

بتعمله ده..

= بعمل إيه!

- ما تتلم يا جيمي..

= في إيه يا ساندي؟!

- إيدك يا عين ساندي..

= ماها.. اليمين أهيه والشمال يجيب بيها الفيشار من العلبة اللي
في إيد نعناعة..

- نعناعة على يميني.. لكن إنت اسم الله على مقامك إيدك على
رجل الست اللي على شمالك!

= قولي والمصحف؟

- والنعمة يا بيبي.. إن شا الله تتشل لو كنت بكذب..

= طب إيه؟

- كتك أوه يا بيبي.. قوم تعالى مكان نعناعة..

= أنا من هنا شايف أحسن..

- چيمي!

= خلاص خلاص.. هروح أقعد في آخر الصف عشان ترتاحي..

010124233133 الرقم الجديد

عشان التاني فاصل شحن.. إتفقنا؟

= والنعمة إنت مسخرة.. أقعد أقعد بهزر معاك.. اللي على
شمالك دي نعناعة.. تموت وتخلص.

&&&

23

البيتزا

- ها نويتوا تتغدوا فين؟

= العيال نفسها في البيتزا أوي.. وأنا بعد البسارة بتاعة امبارح
محتاجة حاجة نضيفه تطهر المعدة..

- أيوا يعني من الآخر هتروحوا فين؟

= هو انت محستش في كلامي إني جاوبت يا بيبي.. يخرب بيت
نباهتك..

- يا بنتي فاهم.. إنتو عايزين تاكلوا بيتزا..

= لولا الملامة كنت فقعتك زغروته..

- طب وأنا اعمل إيه.. هجيب علبة كشري واقعد أكلها؟!

= تصدق صعبت عليا.. ما هو انت اللي غريب أوي! دا انت
أغرب من شوقي غريب.. حد مياكلش بيتزا؟!

- حد ياكل عجين عليه خضار وزيتون وكام حنة فراخ ولا لحمة
ويروح يدفع أد كده!

= أد كده اللي هو إزاي؟! يا جيمي دلوقتي تشتري واحدة تاخذ
عليها اتنين فيري..

- هو انتي لو قلتي مجانا بدل "فيري" دي حد هياخدك مخالفة..
= كل واحد وعلامه.

- طب يلا انزلوا على ما أركن..

= عايز إيه ياض يا شكري؟

* عايز واحدة ويسترن تشيكن

= بربانند في الطفاصة.. وانتي يا نعناعة عايزة إيه؟

** واحدة مارجرىتا يا ماما..

= قولي مامي زي لوچي بنت طنط منار..

** واحدة مارجرىتا يا مامي..

= شطورة حبيبة مامي.. أشوفك مضيقة في مصر للطيران..

كابتن.. بسس.. يا واد يا حليوة انت.. أيوة انت..

مساء الخير يا أفندم أوامرك..

= والنعمة نسيت الطلب.. آه افكرت.. واحدة سي فود
والاثنين الفري واحدة شيكن وواحدة مارجريتا وتليفونك عشان لو
إتأخرت أرن عليك استعجلك..

التشيكن حضرتك عايزاها إيه بالضبط؟

= انت يا بغل يا شكري سيب شعر اختك وركز معايا.. انت
طلبت إيه؟

* ويسترن تشيكن هي صورة..

= وحية أمك أفلعلك الشيشب وأرقعك بيه قصاد الناس.. بص
يا حليوة عايزين الشيكن ويسترن.. إنت ٠١٠ ولا ٠١٢؟

ربع ساعة يا أفندم ويكون الأوردر جاهز..

= متعوقش يا مسبب..

- ها طلبتوا؟!

= كل ده بتركن.. إنت سايق دبابه!

- لأ مانا رحت ضربت ٢ كبدة و٢ سجق من ع العربية اللي
في آخر الشارع..

= يااااي.. إزاي كده..

- إيه يا فكرية.. انتي نسيتي إننا اتعرفنا أصلًا عند "على بركة الله"
بتاع الكبدة اللي في رمسيس..

= إنت قولت إيه يا إيه! سمعني كده تاني..

- ذلة لسان يا ساندي.. متقفيش عند كل كلمة..

= ماشي يا سبعي.. أنا قايمة أجيب السلطة..

- إيه المنظر ده! انتي لازم تملي الطبق ع الآخر كده.. إيه كل
ده.. وعمال يدللق طول ما انتي ماشية..

= مبدئيًا هما اللي يجيبوا أطباق صغيرة.. والسلطة حلوة.. ثانيًا
مفيش حاجة وقعت ع الأرض.. عشان اسم النبي حارسه وصاينه ابني
البكري هباب أفندي كان ماشي فاتح بؤه تحت الطبق بياخد اللي
يدللق زي ما يكون بيرضع من جاموسة.. آه والنعمة..

- طيب شيلي كوبايات المية عشان الأكل جه..

= شفت الواد حليوة إزاي..

- دا شعره ملزق..

= يا لهوي ع الغيرة.. يا بيهي أنا حواليا كتير.. ما لهم ولا تأثير..

خدلك مثلثاية.. والنبي يا جيمي..

- لأ مش بعرف أكلها..

= إنت مترَب أوي يا جيمي.. نفسي تبقى مودرن شوية..

- إقفلي بؤك وانتي بتكلمي يا مودرن..

= جيمي.. بجد بجد مش هزار.. إنت قديم.. إنت لسه عايش في عهد التليفون أبو سلك وقرص.. الاسود ده.. والنعمة تلايقك لسه فاكره موجود..

- ليه يعني.. أكيد مبقاش موجود..

= يا واد يا متمكن.. إنت عارف إن العيال افتكروك اجننت من يومين لما شافوك واقف تلف الشريط بتاع الكاسيت بالقلم الرصاص.. العيال مش فاهمة أصلًا يعني إيه شريط كاسيت..
- ما هو كان هيسف..

= يا جيمي أصلًا كلمة "يسف" دي انتهت.. يا بيبي العلاقة بين القلم الرصاص وشريط الكاسيت انقرضت زي العلاقة بين ذكر الديناصور وأنثى الديناصور.. مش موجودة خلاص يا بيبي..

- وإيه تاني؟!

= تلايقك والنعمة فاكه إن التليفزيون بيوش بعد الساعة اتناشر.. هو انت يا بيبي قفلوا عليك من أيام السادات وفتحولك في ٢٠١٤؟! سيك من الرز والخضار والكشري.. خش عليا في الكريب والبيتزا والمناقيش.. عايزة أمنقشك يا جيمي..

- كلي وبظلي رغي.. وااا شكلها مغري جدًا..

= خرابي عليك.. نفسي فيه وأقول إخيه.. ريقك جري صح؟!

- علی ایہ؟

= البيتزا.. مش بتقول شكلها مغري..

- لأنا بتكلم على حاجة تانية خاااالص.. بصي كده اللي واقفة

بتحاسب..

= اللي بينطلون ملزق دي..

- بطلې دماغك الشمال.. بصي ماسكه في ايديها ايه..

= شنة مكنوب عليها كشري هند.. دا اللى لفت نظرك..

فقري من يومك.. واد يا شكري.. خلص وهات لبابا علبة بستة هو

دا تمامه..

&&&

24

حماتها

- جيمي.. يا بيبي.. قوم يلا عشان تلحق العصر

= شوية كده عايز أناام..

- قوم طيب عايزة أقولك على حاجة..

= عايزة إيه يا فقيرة؟

- خراي عليك وانت معمص.. لسانك بينقط شهد.. اسمع يا

بومبو.. العيال نفسها في الأزهر بارك..

= ماشي بس مش النهاردة..

- ليه يا سبعي؟

= عشان ماما جاية النهاردة..

- تعب عليها المشوار.. خليها قاعدة مرتاحة في بيتها..
- = بطلي هزار بقى.. هي ماما بتجيلنا خالص..
- والنعمة ما هزار.. المثل بيقولك من خرج من داره إتقل مقداره.. تقبلها على امك.. قصدي مامتك!
- = ما هو دا برضه يعتبر بيتها..
- شوف إزاي.. والأوفر فيه غدا ولا ويزاوت؟!
- = طبعًا هتغدى.. حاجة حلوة من إيديكي الحلوين..
- بقم حلوين النهاردة.. مش كده!
- = على طول حلوين..
- هاااار اسود.. تجنن وانت بتسبل..
- = أنا أصلًا رومانسي بطبعي..
- قولي يا جيمي.. مش كنت دايماً تقولي إنك طالع لماامتك؟
- = آه ليه؟
- ما تقضوها كشري، وهجيلها فويل من أبو ٨ جنيه.. انت بتموت في العلبة أم ٦ أنا عارفة..
- = كده برضه.. أنا زعلت منك يا ساندي..
- والنعمة ما أقدر على زعلك أبدًا.. هجيلك إنت كمان فويل
- بـ ٨ إن شا الله ما حد حوَّش!

- يا ساندي الست مدخلتش بيتي بقاها يبجي ٤ شهور تقويلي
تاكل كشري..

= هو مش نعمة ربنا.. خلاص يا چيمي صرفني يا وزير.. قولي
أعمل إيه وأنا أعمل..

- طلعي فرخة واطبخي أي حاجة..

= هو انت غرمان حاجة.. مش فيه جارية بتقف تطبخ وتغسل
وتمسح وتكنس وتذاكر وتغير..

- بلاش بس تقولي "وتغير" .. دي بتاعتي..

= طب قوم ساعدني..

* تيته جت.. تيته جت

= خلاص يا هباب البرك عرفنا..

إزيك يا فكرية.. يوه نسيت إنك بتزرزي من الكلمة دي..
واللهي فكرية أحلى بكثير من غاندي ولا أوستافاندي بتاعتك دي أنا
عارفة انتي مسمية نفسك إيه..

= غاندي وأوستافاندي! لأ إسمي حمدي.. يا ام جمال.. ماشي..
وكم ان عايزني أطلع فراخ.. مش كده؟!

- يا جماعة انتو تجنبوا وانتو بتهزروا سوا.. إيه يا ماما الدم اللي
زي السكر ده... هاهاهاهاهاه.. غاندي وأوستافاندي.. وانتي يا
ساندي فظي.....

أية صح..ساندي.. يبارك فيك ربنا يا جمال يا ابن بطني...
 = على أساس إنه هو اللي مسميني..
 # لأ أكمنه فكري.. وحياتك ولا كان يبجي على بالي..
 = هو دا اسم يتنسي؟!
 # والنبي لو لايق ما كان يتنسي أبدًا.. بس فيه نشاز يا بنتي
 أعمل إيه!
 = وانتي تعملي ليه.. مانا برضه بقول اللي ابنك فيه ده أكيد مش
 هيجيبه من بره..
 - مش هتبطلي هزار مع ماما بقى وتعملي الغدا..
 # هي لسه مخلصتش الأكل؟
 = آه تخيلي.. مجوزة ابنك لسحلفاة بقى تقولي إيه!
 - يا بنتي بطلي هزار بقى.. هيخلص في ثواني يا ماما.. أنا هترل
 اغسل العربية على ما تخلصي الغدا.. ها.. الغدا..
 = بالسلامة انت يا حبيبي متقلقش.. لا إله إلا الله!
 - لا أنا هغسل العربية مش رايح السعودية..
 # قوليلي يا ساندي.. عاملة إيه مع جيمي؟
 = نسمة.. والنسمة نسمة عايشة معاه في البيت.. لا بقوله معاك
 كام ولا رايح فين ولا جاي منين.. معاه بيحب.. مش معاه..
 يتصرف ويحب.. أو مال هنموت م الجوع! يوم عن يوم يا فراخ يا

سمك يا لحمه.. وهارية نفسي فرجة على سي بي سي سفرة عشان
أعمله كل ما هو جديد..

لأ ما هو يقول.. مرة بتبعني تحبي من هند ومرة من الزعيم
منوعاله في محلات الكشري..

= يا جيمي يا ابن الفتانة..

نعم!؟

= بقولك انت من يومك "فتانة" ..

طب تعالي شوفي الترنج ده وقوليلي رأيك فيه..

= الله يا ماما الحاجة.. دا كأنه متفصل عشاني..

تبعني نفسك.. وعارفة إني بحب اللون الأحمر.. كده كثير.. وأنا
اللي ياما ياما ظلمتك وكنت بقول مش بتحبني.. دا انتي مش
يتعملك فرخة.. إطلاااا.. دا انتي الواحد يدبلك شكري والنعمة
ويبقى مسلوع عليك.. يااااا.. الواحد ياما بيسيء الظن.. حقيقي..
لأ وإيه.. أفكار تروح وأفكار تيجي.. وفي حركة واحدة.. الواحد
يخس إنه ولا فاهم أي حاجة.. دنيا غدارة..

خلصتي!؟

= مش عارفة.. حاساني متوترة.. وانتا بتني القشعريرة.. محدش
دخل عليا بهدية من زمن..

المهم.. عجبك!؟

= وده اسمه كلام.. يهوس!

يبقى هيعجبها..

= هي مين دي؟!

البت مرات حسين... عيد ميلادها بكرة.. وهي في عودك
فقلت أجيهولها.. بس برضه ما خاب من استشار.. جيت أخذ
رأيك..

= مرات حسين! أم كرش؟! واد يا شكري.. قول لبابا وإنت
طالع هات علتين على ستة.. وسك على القويل أبو ٨.. ناس ليها
ترنجات وناس ليها جيمي!

&&&

25

السواقة

- جيمي..

= أفندم..

- إيه يا ببي أفندم دي! إنت في الهايكستب..

= عايزة إيه؟

- مش إنت أجازة اليومين دول؟

= هنبداً النبر.. أنا واخد أجازة عشان ارتاح.. مش هروح حتة..

- يا ببي أنا قولتلك وديني حتة.. أنا كان ليا طلب صغنون..

آاااا كدهو..

= قولي يا نُعّة..

- حبيب الثقة والنعمة إنت يا جيمي.. يهده الحب.. ومن الحب
ما شحتف..

= إنجزي..

- إنت مأجر عجلة ربع ساعة.. واحدة واحدة.. إنت بتكلم
أنثى..

= عرفتي بقولك إنجزي ليه.. كل ما بتطولي في الكلام بتكذبي..
قولي يا أنثى أفندي..

- عايزة اتعلم السواقة..

= إيه! ليه الانحراف ده..

- والنعمة ما انحراف.. بس نفسي أسوق أوي..

= مش قادر أتخيلك وانتي بتسوقي..

- وانت محبكش يا جيمي تتخيلني إلا وانا بسوق! يا بيبى أنا
عايزة مصلحتك..

= اللي هو إزاي يعني..

- إفرض واحنا راجعين بالعربية جاتلك جلطة ولا اتشليت.. مش
يبقى فيه حد معاك يتنقذك.. عرفت بقى إني خايفة عليك..

= يا قلبك الرهيف!

- نعمل إيه بقى يا ابني.. خليها علينا..

= إنتي هتعيشي في دور أمينة رزق.. هعلمك بس ليا شرط..

- وعد مش هسرق المفتاح وانت نايم..

= إنتي هبله.. أكيد مش ده الشرط..

- وأكيد مش هركب شباب وأطلع بيهم المقطم..

= أَتَقَطِّمُ وَسْطَكَ يَا بَعِيدَةً.. إِيْهْدِي خَلِيْنِي أَتَكْلِمُ وَبَطْلِي تَنْطِي جَوَا
بُوِي..

- إتفضل.. قول.. أهو اتخرسنا.. قفلنا بؤنا.. إتكتمنا.. حطينا في بؤنا جـ...

= ششششش! بس اهملدي.. لُكلك لُكلك.. عايز اُتكلم..
الشرط هو إني عايزك تبقي نبيهة وانا بعلمك عشان متشلس قبل ما
تتعلمي..

- يا ربي انا ارجو.. بتصعبها عليا والنعمة.. بس هحاول.. يلا قوم إنت هتام!!

- حلاوة يا حلاوة.. والنبي يا جيمي صوري وأنا قاعدة وماسكة
الدركيون عشان أحطها بروفایل بيكشر..

== انتي عايزة تتصورى ولا تتعلمى السواقة؟!

– الاتنين يا بيبي.. وحياتي وحياتي..

= بس اسکتی خلینی اعلمک .. دوری ..

— علی ایہ!

- = يا منجي من المهالك.. يا رب صبري..
- في إيه يا بيبي.. متقلقيش.. مالك بس؟!
- = يا بنتي دوري العربية بالمفتاح..
- عايزني أفتح الكونتاكنت يعني.. طب ما تقول كده من الصبح..
- = الكونتاكنت! طب يا ساندي إفتحي..
- ثواني بس أعدل المراية.. يا هوي عليا قمر.. مُزة ٢٠١٥..
- إحم إحم.. الأجرة ورا يا حضرات..
- = انتي سايقة ميكروباص.. إخلصي ودوري..
- حاضر.. أهو دورنا..
- = بصي بقى ركزي.. رجلك الشمال تدوسي بيها ع الدبرياج وتحبي الأولاني من العصاية دي..
- اسمها الفتيس.. عصاية إيه بس!
- = يا رب انت شاهد ومطلع.. انفتيس يا شوماخر.. انتي رايحة فين.. إيه اللي نزلك في الدواسة؟!
- اصبر يا بيبي بس.. هو انت شايف اللي انا شايفاه؟!
- = اللي هو إيه؟
- في تحت ثلاث حاجات واحنا عندنا رجلين اتنين بس.. إيه بقى!

= اطلعي طلعت روحك.. اللي ع الشمال دبوراچ واللي في
النص الفرامل واللي ع اليمين بترين.. في الغيارات بس بتدوسي ع
الدبوراچ وتسيبي سَنَة سَنَة وتحملني رجلك ع البترين.. ولو عايزة
تقفي بتوسي دبوراچ وفرامل.. يعني في كل الأحوال بتستخدمي
بدالين من الثلاثة أو بدال واحد بس.. عمرك ما هتستخدمي الثلاثة
في نفس الوقت.. فهمتي؟

- أعدمك لو كنت فهمت كلمة واحدة.. بس الشهادة لله.. أنا
منشكحة جدًا وانت بتقول الكلام الكبير ده..

= إمم.. منشكحة!! طيب إحنا سايبين البيت والعيال زمانها قلبته
سويقة عشان سعادتك تشكحي مش كده!

- يا جيمي فكها بقي.. طب بص نبدأ من الأول.

= يا صبر أيوب.. ماشي يا ساندي.. نبدأ م الأول.. دوري..

- على إيه.. خلاص خلاص بهزر.. دورت العربية..

= ها.. كملي..

- بص يا سيدي.. دي مراية.. وده كاسيت.. واللي في إيدي ده
الدركسيون.. وده....

= هو أنا جايب عايدة بعلمها تقولي لي دا دركسيون ودا
كاسيت.. بت إنتي عايزة تجيني؟!

- طب خلاص سيب دماغي هقول هقول.. بناغشك يا جيمي..
اربط الحزام..

= انتي هستهيلي.. يلا اخلصي..

- اربط بس الحزام عشان أعيش الدور.. وانا كمان هربط الحزام.. ندوس ع الدبرياج ونجيب الأولاني واحدة واحدة نسيب الدبرياج وندوس بترين ونطلع كدهو..

= ساندي بالراحة.. هنخط في العمود.. هاتي الثاني.. حاسبي صندوق الزبالة.. المطب المطب.. حاسبي.. دوسي فرامل.. دوسي..

- أي واحد..

= اللي في النص.. ده البترين يخرب بيتك.. اللي في النص.. حاسبي بالراحة.. اقفي اقفيسي..

- إطلع يا جيمي من الدواسة.. يا بيبي.. متخافش..

= نزليني هنا..

- والنعمة ما تخاف دانا لهلوبة..

= بقولك نزليني بدل ما افتح وأرمي نفسي..

- إنزل يا بيبي.. متخافش أنا سويقة قديمة.. أنا هرجع ع البيت.. هتلاقيها في نص الشارع عشان لسه متعلمتش إزاي أركن.. متساش الفينو وإنت جاي يا مهجة القلب.. سلام

&&&

26

أنا بنوثة عسولة

جيمي فاتح الفيسبوك ماسنجر في المكتب:

جيمي: صباح الخير.. يعني فتحتي ومصباحتيش!

أنا بنوثة عسولة: صباح النور.. أنا لسه صاحبة وكنت بعمل نسكافيه..

جيمي: وهتشربه لوحدهك؟

أنا بنوثة عسولة: تعالى اتفضل معايا.. أنا أصلاً رجعت تاني السرير ومكسلة أقوم منه..

جيمي: وشكله إيه؟

أنا بنوثة عسولة: إيه هو ده؟!

چيمي: ااااا.. النسكافية..

أنا بنوثة عسولة: انت شقي أوي..

چيمي: ثواني التليفون بيرن..

أنا بنوثة عسولة: أولك يا روجي..

- ألو أيوة يا چيمي.. كلمتك [?] مرات مبتردش ليه؟

= أيوة يا ساندي.. مشغول جدّا ومش فاضي..

- ربنا يقويك يا بيبي.. كنت عايزة منك حاجة!

= إخلصي في ناس حواليا..

- بالراحة بس يا بيبي.. كنت عايزة باكوين بيكينباودر وانت

جاي عشان عايزة أعملك كيكة..

= طيب طيب سلام.

- سلام!

على الماسنجر...

چيمي: باك.

أنا بنوثة عسولة: ويلكام باك.. فيه حاجة؟!

چيمي: لا دا مديري يبسألني على حاجة.. ورديت عليه.. مفيش

حاجة في الشغل بتمشي إلا لما يرجعولي.. مش بعرف أخذ أجازة

بسبب كده..

أنا بنوثة عسولة: واو إنت شكلك جامد موت وشاطر..

چيمي: يعني مش أوي.. مش هشوفك بقى؟

أنا بنوثة عسولة: أنا لازم أقوم ألبس وانزل عندي محاضرة باي!

چيمي: طب استني هقولك.. يا.. انتي مشيتي! طيب باي.

- حمد الله على سلامتك يا چيمي..

= الله يسلمك.. إنتي لسه صاحبة؟

- لأ يا بيبى أنا نمت.. مانا واقفة قدامك أهو زي الصنم نمت فين!

= خلاص حقتك علياً.. أنا هقعد أدام التلفزيون شوية..

- يعني مسألتيش ع الأكل... إنت إيه حكايتك يا چيمي؟!

= لا حكاية ولا رواية.. بس عشان التقفيل زي ما انتي شايقة

بتأخر شوية وبيصرفولنا وجبة..

- بألف هنا يا بيبى.. أنا هخس أريح لو عزت حاجة بس نادي

علياً..

= نامي أنا مش هعوز حاجة..

- إنت غريب يا بيبى.. بقالك ثلاث ايام الجوع مقرصكش.. دا

انت كان فيه ديناصورات عايشين في بطنك! إوعى تكون مش چيمي

وغيرولك وشك زي فيلم فيس أوف.. شربات ياخواتي.. تيك كير يا
بيبي.

في الليفينج يفتح جيمي الفيسبوك ماستر:

جيمي: هاي إزيك!

أنا بنوثة عسولة: هاي أنا كويسة. وانت؟

جيمي: تمام. يدوبك لسه داخل البيت..

أنا بنوثة عسولة: طب أسيك تاكل وترتاح..

جيمي: لأ أنا معاكي..

أنا بنوثة عسولة: وحشتني.

جيمي: إيه؟! إنتي أكثر.. أكثر أوي.. أكثر خالص..

أنا بنوثة عسولة: إنت شكلك حد رومانسي أوي.. يا بخت
مراتك..

جيمي: أنا رومانسي جدًا.. بس اللي يقدر.. مش هتوريني
صورتك بقي!

أنا بنوثة عسولة: متستعجلش إحنا نعرف بعض من كام يوم بس..

جيمي: طب حتى اسمك الحقيقي..

أنا بنوثة عسولة: دي سهلة. أنا اسمي ندا.. وعندي ٢٧ سنة..

جيمي: الله ع الاسم.. أهى دي الأسماء..

أنا بنوثة عسولة: ميرسى..

جيمي: كنتي بتقوليلي عندك محاضرة. إنتي لسه بتدرسي؟

أنا بنوثة عسولة: لأ أنا خلصت ماس كوم وبدرس مانجمينت
دلوقتي..

جيمي: إيه سيت كوم دي؟!

أنا بنوثة عسولة: هههههه ماس كوم.. إعلام يعني.

جيمي: أوكي.. وتعملي إيه دلوقتي..

أنا بنوثة عسولة: قاعدة في أوضتي بكلمك..

جيمي: طب ما تصوريلي أوضتك..

أنا بنوثة عسولة: إنت شكلك شقي أوي يا چوچو.

جيمي: حلو أوي چوچو دي..

أنا بنوثة عسولة: عجبك الاسم؟

جيمي: جدًا.. خالص..

أنا بنوثة عسولة: محكتليش عن مراتك..

جيمي: ليه بس السيرة الغم دي! بصي إحنا على طول في خناقات
ومشاكل..

أنا بنوثة عسولة: ربنا يصبرك يا جوجو.. حلوة صورتك الجديدة..
اللي شايله ده ابنك؟

جيمي: أه ناير..

أنا بنوثة عسولة: حلو أوي الاسم ده.. معناه إيه؟

جيمي: دا إله البامبرز عند الفينيقيين..

أنا بنوثة عسولة: حلو أوي.. إتعثيت ولا لسه؟

جيمي: لأ.. أنا بعمل دايت عشان أبقى فيت.. وبعدين الأكل
بالليل لازم يكون بحساب عشان الكالوريز..

أنا بنوثة عسولة: دايت ولا مراتك منكدة عليك..

جيمي: أنا حياي كلها نكد ومشاكل.. بس أنا مستحمل عشان
الولاد..

أنا بنوثة عسولة: ربنا يخليهو ملك.. هي بتعمل معاك إيه المتوحشة
دي؟!

جيمي: ياااه أقول إيه ولا إيه.. لا عمرها دلعتني ولا بتسأل تاكل
إيه ولا متاكلش إيه.. مع إن أنا أصلاً آخر همي الأكل.. هي بقى كل
همها الطلبات.. ثواني ثواني..

أنا بنوثة عسولة: أوك

- بيبي إنت بتعمل حاجة؟

= أه.. لأ.. قصدي قاعد شوية ع الت بقرا كام مقال كده..

- شكلك نسيت البيكناودر..

= أه والله معلش.. ضغطة الشغل..

- ربنا يقويك يا بيبي.. إنت بتسعب وهتاخذ على أد التعب..

= الحمد لله! إنتي مش كتنّي هتنامي..

- أعدمك أبدًا.. أديني قاعدة معاك شوية..

=.....

- مالك متنتح ليه؟!!

= ها؟ لا خالص.. ماشي..

- كمل قراية يا بيبي.. أنا هجيب قناة توكتوك كان فيها فيلم غبي منه فيه بس كان فيه فاصل والإعلانات كانت شغالة من ييجي ساعة.. زمانها قربت تخلص والفيلم هيشغل..

چيمي: ندا إنتي لسه هنا.. ندا..

أنا بنوتة عسولة: والنعيمة معاك يا چوچو.. انت قولتلي ثواني..
بقالك ١٠ دقائق يا وحش وإنت بتوحشني..

چيمي: والنعيمة؟! مش بحب الكلمة دي بس مش مهم.. المهم
معلش.. أصل حصلت كبسة!

أنا بنوتة عسولة: إيه مراتك؟!

چيمي: أيوة يا ستي.. غلطة عمري.. قصدي للأسف مراي..

أنا بنوتة عسولة: إنت قولتلي اسمها إيه؟

جيمي: اسمها فكرية.. بس بتحاول تبقى ساندي! مش عارف
إزاي.. حاجة زفت!

- على دماغك يا جيمي..

= إيه ده يا ساندي؟!

- دبانة واقفة على دماغك يا روجي..

= خضتيني..

- سلامتك يا بيبي م الحضة.. كمل قراءة..

أنا بنوتة عسولة: إيه إنت روجت فين تاني؟!

جيمي: معاك يا روجي.. مش هتبعني الصورة بقى!

أنا بنوتة عسولة: أوك.. أهى..

جيمي:.....

أنا بنوتة عسولة: إيه روجت فين تاني..

جيمي: إنتي مين؟

أنا بنوتة عسولة: غلطة عمرك يا بيبي اللي بتحاول تبقى ساندي..

بعوت فيك وانت خاين وأولعوبان!

&&&

البرد

= بررررر.. انا سسسسااالننديي يا چسيمي.. اززززيك يا ييي..

- إيه يا ساندي اللي انتي عامله ده.. ماشية بالباطنية في الشقة..
وزعبوط على دماغك.. وإيه اللي في رجلك ده.. شراب الكورة
بتاعى!

= يا بيبي.. والنتيعة ما قادرة أتحرّك من البرررررررررر..
اتعشيت؟ قول آه.. ورحمة عم شكري ما قادرة أرفع غطا الحلة ولا
أشطف معلقة..

— جوعان یا ساندى..

= من يومك يا بيبي..

- نعم؟!!

= متدقش يا جيمي.. الجو سقعة والواحد مش مسيطر على نفسه.. هو انت يا بيبي مش بردان زينا!

- بردان طبعاً بس مش لدرجة إني ألاقى بطانية بتمشى في المطبخ.. وإيه الدخان اللي خارج من الليفينج ده كمان إن شاء الله؟! الشقة بتولع..

= يا ريت يمكن ندفا.. متقلقش أنا مولعة خشب في الأصعة قدام التلفزيون..

- أصعة وخشب! انتي مجنونة؟!!

= لأ بردانة.. كنت عايزة أتفرج على حريم السلطان.. خفت اتجمد وأنا قاعدة.. ولقيت أم تامر مرات البواب مولعاها قدام البيت فعملت زيتها..

- هتشل.. اللي بتعمله ده بوليوشن.. وهيهدلنا!

= بتاع إيه يعني.. هو فاكر نفسه اشترى العمارة..

- مين ده؟!!

= بولوشان اللي بتقول عليه ده..

- يا أذكى الكائنات.. أنا اقصد التلوث اللي طالع في الجو.. ده غير التلوث اللي خارج من بؤك!

= يا ببي مش أحسن ما تتجمد ومنعرفش نفكك..

- هاتيّ العشا.. بطني بتقطع م الجوع!

= والنبي يا جيمي نام خفيف خفيف.. مش قادرة..

- يلا يا ساندي أنا طول اليوم على لحم بطني..

= حسي الله..

- واعملي كوباية شاي..

= حسي الله.. إلهي تجمد زي جاك بتاع تيتانيك!

= إتفضل..

- إيه ده جايبالي شاي ساقع!

= ما هو بيطلع دخان قدامك أهو..

- الشاي برفعه على بؤي لقيته ساقع!

= طاب أعمل إيه أنا طاه!

- اعملي واحد تاني.. انتي مش مراي!

= طلقني يا ببي.. واعتبرني مش مراتك..

- ماشي يا ساندي.. اطفي الولعة..

= إيه الحكومة جاية؟!

- الحكومة جاية! أنا متجاوز حشاشة في غرزة! ارحمني.. أنا
داخل في السرير..

= وراك يا سبمي..

- انتي مالك ماشية زي الإنسان الآلي كدا ليه؟

= يا بيبي أنا لابسة سبع حاجات من فوق وتلات بنطلونات
وشرايين وزعبوط وجوانتي.. عايزني امشي زي بتوع الباليه!
- هفطسي يا ساندي..

= يا ريت يا جيمي دانا بقالي ساعتين قبل ما تيجي قاعدة بحاول
أحرك صوابع رجليا.. وهما ولا الدموع.. باصين للسقف في حالة
تجمد..

- طب يلا اتغطي ونامي..

= افرد علينا اللحاف فوق البطانية..

- حاضر..

* ماما.. ماما..

= قولي مامي يا روحي..

* مامي.. مامي!

= نعم يا نعنوعتي..

* تعالي غطيني..

= اتغطي انتي يا روحي. شطورة حبيبة مامي..
 * مش عارفة وبردانة أوي وخايقة اعمل بي على روحي!
 - ما تقومي تغطي بنتك يا ساندي!
 = بالمناسبة.. هي بنتك انت كمان.. ما تقوم انت تغطيها..
 - ما انتي شايفاني متغطي..
 = وانت شايفني بطريق قاعد جنبك ع السرير.. ولا دُب جاي
 من القطب الشمالي ونازل يصيف جنبك!
 - بطلي مقاوحة وقومي..
 = ناولني الكوين اللي ع الكومودينو جنبك ده..
 - هتعملي ايه؟!
 = هلاعبك ملك وكتابة ع اللي يقوم.. العمر مش بعزقة يا
 جيمي..
 - أنا مش قادر أقوم من تحت البطانية.. دانا هموت وادخل الحمام
 ومش قادر عشان المية زمانها زي الرصاص!
 = البت سقانة قوم غطيها يا جيمي..
 - طب العبي ملك وكتابة.. أنا الملك..
 = مش وقت تناكة! المهم هات الكوين.. أهو شفت.. ظهر
 العدل إنت اللي هتقوم يا نجم..

- انتي بتخمي!

= قوم یا چیمی مش وقت استهال..

[illegible]

= ولع يا روحي.. بس إوعى البولوشن يبهدلك! والنعمة شكلك كنت بتضرب ثاني أكسيد الكربون ع القهوة وانت صغير!. بقولك.. وانت جاي إعملى كوباية شاي وحياة ابوك يا جيمي.

&&&

28

الدايت

- ألو.. أيوة يا منار.. طمنيبي الدكتور إداكي الورقة.. طب
كويس مليني.. بس واحدة واحدة.. أقولك إبعثها ع الواتس.. سلام
يا قطي.. امواه..

= بتكلمي مين يا ساندي؟

- بنسوار يا جيمي.. كنت بكلم عيادة التخسيس بحجز معاد
بكرة.. هات متين جنيه..

= إيه! ليه؟

- يا بيبى عشان الدكتور.. هو انا هاخد حاجة في جيبي؟!

= كتير يا ساندي.. هو هيتزل الكيلو بكام؟

- بص هو طبعًا هيتزل الكيلو عنده أغلى عشان في مصر الجديدة.. بس في سوق العبور أرخص! انت ليه بتعامل معايا على إني شوال بطاطس!!

= طب ما انتی حلوة کده..

- يا كذاب يا بيبي.. أو مال برميل الطرشي اللي قتلها إمبراح دي كانت معاكسة؟!

= طب متبقى قد ايه في قد ايه؟

- هبقي ٤ x ٦ ..

= بطلی سخافه.. أقصد هتبقى كام كيلو في وقت قد إيه؟

- آه مش تقول كده.. هو بيقول عشرين كيلو يترلوا في شهر..
أنا غالباً محتاجة ٦ شهور.

= یعنی ۱۲۰۰ جزیه! حرالام..

— هبقى مُرّة..

== مستحیل!

- مستحيل تدينى الفلوس ولا ابقى مُرّة؟

= الاتنين..

— یا چیمی متحبطنیش..

= يا ساندي.. يا ساندي مش بحبطك.. بس أنا عارف النتيجة..

- طب نجرب .. مش هنتخسر حاجة ..
- = إيه نجرب دي .. جربي انتي .. أنا مليش دعوة!
- المشاركة مهمة يا بيبي .. وبعدين أنا لو عملتلك أكل هاكل ..
ويبقى فلوسك راحت ع الأرض!
- = أفهم من كده إنك مش هتعملي أكل ..
- أوف كورس ..
- = كورسي على دماغك .. أنا مالي .. تخسي ولا تبرطشي زيادة ..
أنا مليش دعوة .. أنا عايز ألاقي أكل!
- هتلاقي .. بس أكل الدايت .. وأنا بدأت من النهاردة ..
- = وإيه بقى نظام أكل معاليكي النهاردة؟
- ثانية واحدة .. يا رب يا منار تكوني بعتي .. أيوة أهو ..
- = بتقولي إيه؟
- سلامتك يا بيبي .. إنت كنت عايز إيه؟
- = كنت عايز اعرف حضرتك عاملة أكل إيه النهاردة؟
- النهاردة جبة قريش وخيار ..
- = لأ ..
- أومال عايز إيه .. إرضي يا ابني وخليك أنواع .. الأناعة كتر لا
يفنى ..

29

الرصيد

- ألو.. أبوة يا بت موعة.. عاملة إيه واحشاني.. والنعمة
واحشاني بس قلة الرصيد هي اللي حايشاني.. مانا أهو....

* عفواً لقد نفذ رصيدكم..

- جيمي.. جيمي.. بيبي.. بيبي!

= إيسيه!! إدي نفسك مساحة اعرف أرد فيها..

- حاضر.. جيمي.. مساحة.. بيبي.. مساحة..

= إنتي هبلة!؟

- لأ.. عبيطة ليه؟

= إخلصي عايزة إيه.. عايز أكمل الماتش..

- مين ومين؟

= توتنهام وتشيلسي..

- يا عم الانجليزي يا عم.. إن شاء الله طنط إهام تكسب..

= طنط إهام! اسمها توتنهام.. توتنهام.. وبلاش كتر كلام ونبر..

إن شاء الله تشيلسي هي اللي تكسب..

- كام كام..

= ٣:٤ لتوتنهام!

- مش قولتلك.. يا بيبى أنا في الكورة حاجة ثانية خالص.. بس

الدوري ريال مدريد هو اللي هياخدوا.. انسى يا معلم ولا تقولي

توتنهام ولا شيبسي بتاعتك دي ولا أي حد..

= ريال مدريد؟!

- مالك يا عم المندهش.. إنت واكل فريسكا.. أه ريال مدريد..

ماها.. وحشة.. وبكرة ميسي يكهربكوا..

= قومي من هنا.. إنتي اللي عندك كهربا في محك.. توتنهام

وتشيلسي ده دوري إنجليزي.. ريال مدريد ده دوري تاني خالص

اسمه الدوري الأسباني.. ميسي بقى أصلًا مش في ريال مدريد ده في

برشلونة..

- والنعمة؟!

= تخيلي!

- ولا اعرف أي حاجة عن الكلام ده! الاستعمار مخلاش..
وولاد الحرام مخلوش لولاد الحلال حاجة.. بكرة النوة تاخذ المفتری..
وهو فيه حاجة بتدوم.. أهو إنت بتديني المصروف من هنا وهوووب
يطير..

= شششششش.. بس اکتمی.. إفصلي.. إیه هو اللي استعمار
وولاد حرام وولاد حلال ومصروف.. وإیه هوووب دي کمان؟!
- موسیقی تصويرية.

= امشي اطلعي برة.. عايز اشوف الماتش..

- طب حولي رصید..

= نعم ياخي؟! أنا مش لسه شاحنك ع الهوا!؟

- والنعمة من كتر الشحن ع الهوا شكل الرصید استهوا في الجو
الساقعة ده..

= انتي هستهيلي؟

- طب أعمل إیه.. الباقية خلّصت ع الرصید.. وأمك بتديني رنة
وتقفل.. ساعة يا جيمي كلام النهاردة وسؤالات عن العیال
والمذاكرة وامتحاناتهم ودفي جمال والعیال.. وقعدت یيجي نص ساعة
تکلمني عن مرات حسین واللي عاملاه فیها.. وأصلًا أمك ٠١١

= طب ما انتي معاكي غمرة ٠١١!؟

- هو أنا مقولتلکش؟

= اتخفين!

- إديني الأمان طاه..

= إخلصي!

- مش حاكية إلا لما تديني الأمان..

= معاكي الزفت..

- شكراً يا ذوق.. متشكرين يا متعلم يا بتاع المدارس.. يا واعى.. يا نبیه..

= يا بنتي هتشل.. إنجزى!

- مش وانا راجعة من السوق إمبراح البك اتسرق..

= بک إيه؟ كيس الفلوس؟!

- الحمد لله مكنش فيه فلوس.. بس كان فيه الموبايل اللي فيه شريحة اتصالات.. بس والنعمة كان أصلاً تليفون معفن..

= يعني الفلوس ما اتسرقتش؟

- لأ يا بيبي.. الحمد لله.. حولى رصيد بقى بعشرين جنيه..

= هما عشرة بس..

- عشرين والنبي.. والنبي..

= طيب اصبري.. ها شوفي كده..

- حلاوتك يا جيمي يا فيص.. تسلم يا بيبي..

= طب إنتي مجبتيش كارت ليه مش الفلوس ما اتسرقتش؟ أصلًا
المصروف خلصان من ثلاثيام!

= إيه؟!

- الحق الجون الخامس جه.. حلاوتك يا طنط إلهام..

&&&

30

بوكيه الورد

- ساندي.. ساندي..

= ويلكام باك يا بيبي.. إيه الابتسامة اللي على وشك دي..
أخذت علاوة؟!!

- لأ..

= إدولك وجبتين بدل وجبة..

- لأ برضه..

= أومال مالك يا بيبي؟! إنت من الفرحة النصارة طلعت من
ودانك.. فيك إيه؟!!

- غمضي عينك..

= متقولش .. جايب هدية ..

- غمضي بس ..

= حاسة إني هسورء .. لو مت إدفن الهدية معايا ..

- يا ساندي متقوليش كده .. غمضي يا روعي!

= والنعمة حاسة بمغص .. أهو ..

- فتحي .. بس واحدة واحدة ..

= إيه ده .. ورد! مش مصدقة .. جيمي إنت بجد ولا فوتوشوب!

- بجد يا ساندي ..

= لأ أنا في حلم .. والنعمة الدنيا بتلف بيا ..

- ليه بس يا حبيبي ..

= ليه إيه .. يا بيهي إنت آخر مرة دخلت بحاجة في إيدك كان

قرطاس طعمية وفيه حزمة جرجير .. واتخانقت معايا يومها .. فاكرك؟!

- طبعًا فاكرك .. مكشش فيه عيش والجو كان ساقعة وحلفت مانا

نازل ..

= يومها قولتلك نفسي في ورد يا إبراهيم .. قولتلي إنتي فاكرة

نفسك هند صبري .. من الحنقة قعدت يومها آكل آكل لحد ما

خلصت الطعمية كلها حاف ..

- كنت عايز أشقك نصين .. بس قلت يا واد استهدى بالله ..

ومن يومها بدأت علاقتي بعلبة الكشري أم ست.

= بتجني يا تيمى..

- إنتي عشرة عمر.. بحب غباوتك.. أحلى بيبي في الدنيا..
صحيح في صوت باجور خارج من بؤك وانتي بتصحى العيال
الصبح.. بس خلاص أخذت عليه.. كمية علب الكشري أم ستة
اللي اكلتها ضيعت نظري اكثر ماهو ضايع..

= بس بقى هعيط..

- إنتي عارفة.. أكثر حاجة مجنناني فيكي إيه.. إن الواد شكري
واخد نفس دماغك..

= دا عيل متخلف..

- بالضبط.

= قصدك إنا..

- أيسوة.. بس بحبك وانتي كده ومش عايزك تتغيري..

= مش بتكسف مني لما بخرج معاك؟!

- بالعكس.. بحب حبك ليا..

= والنعمة ساعات بخاف تتشل بجد..

- لأ ما هو بجد انتي تشلي..

= ما تقلقش.. أنا عاملة حسابي هذبة عيد ميلادك الجاي كرسى
متحرك.

- أنا هنضل ماسك الورد كتير كده..

= طب معلش.. خديني على قد عتلي.. الورد ده بجد ليا؟!
 - لأ لامي! ده سؤال؟! طبعا يا ساندي..
 = طب إنت الدكاترة قالوك هتموت بعد أسبوعين ف انت
 قررت تعمل حاجات حلوة قبل ما تفيص وترحل؟!
 - فال الله ولا فالك.. إيه الكلام ده؟! لأ طبعا.. يا بنتي أنا أصلاً
 رومانسي بس مذك.. ودي حاجة بسيطة بس متاخدش على كده..
 = وربنا ما مرتاحة.. في حظيرة فيران بتلعب في عبي!
 - هاتي فافطة خرينا نخط فيها الورد..
 = فافطة.. فافطة.. فافطة..
 - إنتي بتندهي عليها?!
 = يا بيبى إحنا الورد عمره ما دخل بيتنا.. فطبيعي إني متفكرش
 طريق فافطة.. خلاص لقيتها..
 - إيه هي?!
 = إنت واثق إن شكري طالعلي انا?!
 - قصدك إيه!
 = الفافطة في البوفيه بتاع السفارة اليمين ورا مكنة
 البسكوت..
 - طيب امسكي الورد على ما أروح أطلعها..

= إوعى تكسر ها دي ف القائمة ..

- حاضر ..

= والنعمة شربات وانت مؤدب وطوع ..

- خدي يا ستي ..

= تسلملي يا سبعي .. نفك الورد من اللفة .. إملاي الفاظة مية

لنصها كده يا بيبي .. إيه ده إيه الكارت الحلو أوي ده ..

(إلى حبيبي جيمي .. إمضاء/عفاف)

هااا اسود .. عفاف .. وتقولي الورد ليكي وبجب غباوتك .. أنا

هوريك غباوتي .. بتضحك على إيه!

- إهدي يا مجنونة .. اقلبي الكارت ..

= أهذا .. إنت هتشوف الجنان اللي على أصله ..

- بس إسكتي شوية وإقلبي الكارت ..

= ماشي ..

(بحبك يا مجنونة .. أصلًا مفيش حد اسمه عفاف .. ده إسم أنا

اخترعته عشان تغيري وتبطلي برود .. بحبك والنعمة ..

إمضاء/جيمي) ..

&&&

31

كدبة أبريل

- مالك يا جيمي ضارب بوز ليه؟! حد داسلك على طرف يا
بيبي؟

= قرفان شوية يا فكرية.. اليوم كان كله مشاكل..

- ربنا يسود أيامك قادر يا كريم.. يا راجل بقى أنا مهتمة بيلك
وانت تقولي "فكرية"! هي ساندي هتجعلك بؤك اللي شبه نفق
الشهيد أحمد حمدي لما تقولها..

= معلش يا ساندي زلة لسان.. بس اليوم كان مش حلو..

- ليه يا بيبي دا النهاردة حتى أربع مش ثلاث.

= ما شي يا خفيفة.. ها عملي أكل؟

- المهم.. إنت إيه اللي خانقك؟

= هحكيلك واحنا بناكل.. عملي أكل؟

- شكلك يا بيبي متعصب.. خش ريح شوية وبلاش تتكلم كثير
عشان متعبش زيادة..

= لما آكل هنام.. المهم عملي أكل؟

- تخيل النور قطع كام مرة النهاردة.. حن؟! ها! يجي ثلاث
مرات.. أه والنعمة.. وكل مرة يقعد بالساعة.. أنا شكلي هزل
اعمل مظاهرة..

= بقت حاجة لا تطاق بجد.. حتى في الشغل النور بيقطع.. إحنا
ناكل ونفكر في موضوع المظاهرة.. المهم عملي أكل؟

- إنت غريب أوي يا جيمي.. بجد غريب.. لا بجد.. وأنا مبتتش
قادرة أستحمل..

= إيه اللي أنا قولته يدل على غرابة؟!

- يا بيبي عمال تسألني عن الأكل كل يوم.. مش كده.. أنا
بسألك عن حاجة في شغلك! مش طريقة.. كل واحد له خصوصياته
ومش معنى إني اتجوزت إني هتنازل عن شخصيتي ولا عن
استقلاليتي.. أنا امرأة حرة في مجتمع حر..

=

- إفضل باصلي بقى طول الليل..

= يا ولية الله يهدك فين الأكل أنا جعان ومحطتش لقمة في بؤي
من صبحية ربنا..

- قول كده.. أنا جعان.. لكن أسئلة أسئلة أسئلة.. مش كده..
أنا طاقة يا جيمي.. والإنسان إيه غير طاقة.. وأنا طاقتي بتروح بقى في
المناهدة وكتر الكلام.. وعلى رأي المثل نام جعان يختار عدوك فيك..
والمثل صحيح.. هعرفك منين عدوك لما متاكلش وتحس وتتمت
وتبقى اد كداهو.. والنعمة هترجع شباب.. والستات هتجري
وراك..

= ويعدين؟

- في الستات، ولا عدوك؟!

= أنا مش عايز أكل أنا هخش انام...

- إخس عليك ووقفني في المطبخ طول اليوم تروح هدر.. بقى أنا
عمالة أقول يا بت يا ساندي تعملي إيه لجماجيمو حبيبك تعملي إيه!
واقف أحمر وأشمر وتقولي هنأ؟! يا أخي حس بيا يحس بيك ربنا.. إنتو
كده يا صنف الرجالة عايزين الست القوية المفترية وأنا عشان يتيمة
تعمل معايا كده!.. هتروح من ربنا فين.. ها قولني فين.. حسبي الله..

= أنا أسف.. أنا..

- بعد إيه.. يفيد بإيه الندم..

= يا ستي خلاص بقى أنا أسف والمسامح كريم.. ممكن تغفريلي
شوية من الحمر والمشممر.. هموت م الجوع..

- محمر ومشمرا! إيه اللي بتقوله ده يا بيبي! هو النهاردة إيه

چيمي؟

= الأربع..

- كام في الشهر؟

= ١ ابريل

- كل سنة وأنا كدابة يا بيبي.. أفتحلك تونة؟ ولا أجيبلك علبة

كشري بستة؟

= اتفتحت دماغك يا بعيدة..

- أحبك يا كداب.

&&&

الفسيوخ

- هابي رنجة داي يا جيمي.

= إيف إيه الريجة المعفنة دي..

- إخس عليك يا ببي.. حد يقول ع الفسيخ والرنجة والملوحة
ريجة معفنة؟!

= فسيخ وملوحة! مش انا قايلك ميت مرة الحاجات دي
متدخلش البيت؟! نسيقي اللي حصلى السنة اللي فاتت؟!

- يا ببي إنت اللي صحتك فستك خالص.. مانا كلت
ومحصليش حاجة..

= طيعي ميحصلكيش حاجة.. واحد معفنة بتاكل حاجة معفنة
هيحصلها إيه!

- يخرب بيت دمك اللي زي الشرابات..

= على فكرة دي شتيمة يا فكرية مش مداعبة..

- يا ببي متخلينيش أطلع الغباوة عليك وإنث شبه السردينة زي
ابنك شكري.. مشيها ساندي عشان اليوم يعدي..

= وإيه اللي في الطبق ده كمان؟

- ده حضرتك.. بيض!

= نعم؟!

- قصدي اللي في الطبق ده بيض ملون يا ببي.. شم نسيم بقى
وربيع وكده..

= اعمليلي مكرونة عشان أنا جعان..

- الأنوبة خلصت..

= يعني إيه؟!

- يعني هناكل كلنا نفس الأكلة.. شوف كمان جايالك إيه..
بصل أخضر وخيار وجرجير.. واخد بالك إنت جرجير هال.. يا رب
نفهم.. وكمان حلبة خضرا.. أي خدمة..

= يا سلاااام.. الواحد مكش عارف هيعمل إيه من غيرك.. أنا
جعاااان..

- إحنا هنخرج يا جيمي وهناكل كلنا نفس الأكلة.. ده يوم في
السنة يا ببي..

= بس أنا مبحش الأكلة دي..

- لا يا جيمي.. متقولش كده.. إنت من أحفاد الفراعنة.. ابن
مصر الفلاح الأصيل .. إنت ورور يا ببي..

= إلهي يوروروا عليك يا بعيدة..

- تجنن يا مضروب.. خش حط نفسك في القميص والبنطلون
على ما ألبس العيال.. عايزين نشم النسيم بقي..

= إلهي ما توعي تشمي حاجة..

- بتقول حاجة يا جيمي!؟

= مبقولش!

- يا جبان إنت يا حلو.. إن ما قتلتك بالليل بريحة البصل بمقاش
أنا ساندي...

في أحد شوارع المحروسة..

- إنت مالك بتلقت حوايك كده ليه؟

= عشان الجريمة اللي شايها في الكيس الاسود اللي في إيدي..

- يا جيمي ده فسيخ وملوحة مش قبيلة!

= اللي هتعمله القبلة أخف بكتيير من اللي هيحصل بعد ما
ناكل البتاع ده.. إنتي مش شامة الريحة.. دي زماها وصلت أمريكا..

- بالك يا .. تلاقى أوباما بذات نفسه بيحسدك ع الأكلة

دي..

= أوباما بذات نفسه! شوف إزاي..

- أومال يا بيبي.. دا تلاقيه يا ولداه هيموت وميشيل مراته تأكله
فسيخ وملوحة وبصل.. ستات مبتصونش إجازتها.. ياكش انا بس
اللي أصيلة وطيبة..

= هعيط.. لا بجد هعيط يا ساندي..

- بتريق عليا يا بيبي.. بكرة تشوف..

= مش لو جه علينا بكرة بعد الأكلة دي.. إمسكي خليني أروح
أقطع تذاكر الجنينة..

- مانا شايلة الواد ابنك.. روح يا جيمي وبطل تلاكيك..

= صباح الخير ممكن تذكرتين..

* إيف الله يقرفك ع الصبح إيه ريحة التتانة دي!

= كل سنة وحضرتك طيب بقى شم النسيم وكده..

* إمسك التذاكر أهيه إنت هتقف ترغي..

= شكرًا يا افندم شكرًا

- جيت التذاكر يا بيبي؟

= أيوة أهيه..

- كان بيقولك إيه عم شكشك اللي في شباك التذاكر ده؟

= مفيش كان يقولي إيه الريحة التحفة دي إنتو جايين الفسيخ
العالمي ده مين؟

- مش بقولك.. والنعمة ما استرخصت.. جبت من الغالي..
رحت أنا والست أم وليد مرات الأستاذ حمدي جينا من الفسخاني
اللي في الدوران ..

=تربنا يستر..

-اقعدهوا هنا يا عيال الحة دي ضلة وحلوة.. إفردى الملاية قصاد
اخوكي يا نعاة..

*حاضر يا ماما.

-قولي مامي يا روحي.

*حاضر يا مامي.

- أشوفك عروسة حبيبة مامي.. وانت يا واد يا شكري بعد ما
تفرد الملاية طلع أزايد المية المتلجة عشان تسبح على ما ناكل..
الفسيخ بيحب يعوم..

** خلي عابدة تطلع المية ما هي واقفة مبتعملش حاجة..

- عيدوك السنة يا بعيد.. خلّص واسمع الكلام بدل ما أقول
لأبوك على نتيجة الميديترم..

** خلاص هطلع الأزايد.. مش خوف منك ..

- أو مال إيه؟

** ده جن.

- ماشي يا اهيل..

= يا ساندي الريحة صعبة أوي..

- طبعي يا جيمي.. مش فسيخ!

= يا ساندي الققط اللي كانت حوالينا كلها جريت أول ما
طلعتي الأكل..

- يا جيمي بلاش هلاوس.. إحنا زينا زي الناس واللي هيسري
عليهم هيسري علينا..

= طب إيه رأيك مناكلوش ونروح ناكل أي حاجة.. أنا موافق
أكل كشري بستة..

-وانا برضه يرضيني دانت الغالي.. كل كل.. دانا جايالك ٣
كيلو فسيخ معتبر ولا الملوحة.. إوعى وشك.. ومتقوليش ع الرنجة..
أوه ماي جاد..

في الطريق للبيت

-يا بيبي دي تالت إزازه مية تقربعها.. مش كده معدتك..

= معرفش مالي.. حلقي ناشف وحاسس إني مش مضبوط.. إيه
اللمة اللي عند البيت دي..

-معرفش.. واد يا شكري شوف إيه اللمة اللي عند البيت دي
وتعالى قولي..

**عمو حمدي اللي فوقينا جاله تسمم والإسعاف جت عشان
توديه المستشفى..

= الواد ده يقول إيه؟!

- مفيش يا روجي بيقول بتاع الأنابيب معدي عشان يغيرلنا
الأنبوبة وأعملك المكرونة اللي نفسك فيها ..

= حمدي جارنا جاله تسمم! .. مش ده اللي جبتي الفسيخ انتي
ومراته من الغالي اللي في الدوران!

- يا بيبى إحنا مالنا.. طب هو معدته فستك.. المهم قولي عايز
المكرونة بصوص أحمر ولا ابيض؟!

= إلهي تتشلي يا بعيدة.. بطناaaaaaaaaااي..

- إجري يا واد يا شكري ع الإسعاف.. قولهم في زبون تاني.. إيه
يا اخويا الرجالة المفستكة دي!

&&&

33

النور

- مين اللي فتح باب الشقة؟!

= أنا!

- إنت مين يا بيبي..

= إنتي عبيطة يا ساندي؟! أنا جيمي..

- قول كلمة السر لاغزك بالسكينة.. والدنيا ضلمة وانا مش
ضامنة ترشق فين وممكن أضيع مستقبلك..

= كلمة سر إيه يا مجنونة! وإيه أغزك دي! مالك بس.. يا
ساندي! هو كل يوم نفس الموال.. يا ساندي بقالنا ثلاث شهور
بتختبريني!

- إن شا الله يقولوا ثلاث سنين.. الاحتياط واجب يا برنس! يلا
بلاش تضيع وقت.. ممكن أستفسر عن بعض البيانات يا افندم؟

= إنتي مالك قلبي على بتوع الكول سنتر.. إتيلي استفسري
عايز اخش أقعد أنا هلكان طول اليوم..

- تاريخ انتهاء البطاقة؟

= أشوفها إزاي أنا في الضلمة دي..

- عندك حق.. إيه الغباء ده! سوري يا بيبي.. طيب إيه الكلمة
اللي بتشلني منك؟

= فكرية..

- صح! يبقى إنت جيمي.. حمد الله ع السلامة يا بيبي.. معلى
أنا بحترز..

= بحترز.. طب يا ريت تحتري نفسك وبلاش الحركات دي كل
يوم.. أنا تعبت..

- إنت بتقلش يا جيمي! المهم بص يا بيبي طول ما النور قاطع
هتلاقيني قلقانة كده.. يا بيبي أنا عاملة للعيال كلمة سر.. أه
والنعمة.. وبعدين خد هنا أما أقولك.. إنت عايز تشلني يا راجل؟!
هو انا مش قولت ميت مرة بلاش فكرية دي؟ اسمي ساندي يا
جيمي.. أو كي؟

= يا مثبت العقل.. يا ولية إنتي مش كنتي بتختبريني..

- صح يا بيبي.. وطلعت نبيه..
- = طيب وسعي عايز أخش غير هدومي..
- طب خد أقولك ده المطبخ يا بيبي.. استنى أما أجيلك
الكشاف..
- = طب بمناسبة المطبخ.. إيه؟ ها.. إيه؟!
- مالك يا بيبي؟
- = إيه النظام؟
- أحسن م الهرجلة..
- = بطلي استظراف.. جعان..
- طب ما تخليك شجاع وتقول على طول.. حزر فزر..
- = لأ متقوليش.. مكرونة فرن؟
- غلط..
- = كباب حلة..
- برضه غلط..
- = اممم.. محشي كرنب..
- الجو حر والكرنب غير مفيد لا ليا ولا ليك.. ها؟ حنّ بقى؟!
- = معرفش قولي انتي بقى وخلصيني..
- عاملا لك قلقاس...

= إيه؟! قلقاس.. إحنا بقالنا أسبوع بناكل قلقاس..

- وفيها إيه.. أنا أصلًا مخزنة قلقاس كتير في الفريزر.. وفاض شوية مية قلقاس في الحلة استخسرت أرميهم.. طلعت كيس وسقطته في الميه..

= يعني أنا هعيش تحت رحمة مية القلقاس.. يا ريتك قولتيلي كنت اتيلت شربتها بالليل بدل الورطة السوداء دي..

- إنت بتقول على نعمة ربنا ورطة.. إستغفر الله.. سامحه يا رب..

= يا ستي انتي هتكفرينا.. أنا يا ساندي مش بحب القلقاس.. بس خلاص كل أعضائي مبقتش مستحيلة فكرة الكشري شكلاً ومضموناً.. وانا مش حابب أعادي أعضائي.. فاضطريت أروض لفكرة القلقاس..

- الخلاصة أغرف ولا مغرفش.. الجو حر ومفيش مروحة وانا مش مستحيلة فرهدة..

= إغرفي وأمرني لله..

- خش غير على ما اغرف..

= لأ أنا جعان.. هاكل الأول..

- يخرب بيت الكائنات اللي عايشة في معدتك..

= هاتي الرز الأول أناأنا فيه على ما تغرفي القلقاس..

- كله مع بعضه يا بيبي عشان تستفاد من الوجبة.. وجسمك ياخذ غرضه من الأكل..

* = ياخذ غرضه!! أستغفر الله! وبعدين وجبة إيه بس ده على أساس إنك عاملة قلقاس دايت!!

- مياخدش منك إلا تريقة ولسان قد كده.. مفيش شكرانية! دانا حيلي اتهد وطول اليوم من الأوضة دي للأوضة دي لما خلاص ورمت.. وأقول لأ يا بت يا ساندي جوزك يبجي أول حاجة يلاقيها خلصانة هي لقمته..

= يا ملين.. حفظت الموشح اليومي ده وربنا.. إخلصي يلا جعانااا..

- إتفضل.. كل.. يا رب نتبط ونسكت شوية..

= إيه ده القلقاس ماله طعمه غريب كده ليه..

- ماله بقى القلقاس.. طلع فيه بقى الققط الفطسانة..

= إهمدي شوية ونوري كده الكشف.. هاااار اسود.. انتي طابخة

فراولة!

34

كحك العيد

- هابي فيست يا جيمي.. تقبل الله والسنة الجاية على عرفات..

= أعمل إيه على عرفات في العيد الصغير؟!

- ياخويا خليك بحبوح ده الدين يسر..

= ماشي يا ساندي كل سنة وانتي طيبة..

- وانت طيب يا ابو العيال.. فين العيدية؟

= إحنا كبرنا يا ساندي على الكلام ده.. وبعدين مانا جايب

كحك..

- خلص.

= إيه ده اللي خلص يا بعيدة؟!

- الكحك .. هات العيدية ..

= مفيش عيدية ..

- هات العيدية لا اشقك

= سبي لياقة الجلاية .. خدي ..

- إيه ده! عشرين جنيه؟! وجاي على نفسك ليه كفاية عشرة ..

= ملقتش فكة ..

- هاااار اسود .. لا هو انت بجد كنت هتديني عشرة جنيه ..

= أه ليه لأ .. مش جايلك علبة كحك غير اللي اتعمل في البيت .. وبعدين كحك إيه اللي خلص يا برُطَة انتي؟!

- يخرب بيتك يا جيمي إنت منستش!! بص يا ببي إحنا كل اللي كان عندنا أول عن آخر علبة كحك وعلبة بسكوت .. والعيال خلصوهم ..

= علـ .. إيه؟! والعجن والخيز اللي كان مالي البيت والدهولة اللي كنا فيها راح فين ..

- يا ببي دول كام كيلو دقيق على كام كيلو سمينة على كام بيضة وشوية نشادر ويكيين باودر بخمسة جنيه .. بس ..

= بس! وراحوا فين الكام بيضة والكام كيلو دقيق والبيكين زفت على دماغك؟!

- يا بيبي إهدا إحنا في عيد والسبت صفاء بتغني سعد نبيهة
ولمواخذة البمب مالي الدنيا..

= إنجزي..

- بص يا بيبي أنا مشيت حسب مقادير الشيف حسن.. وربنا لا
جرام زيادة ولا معلقة أقل..

= ها؟

- يا بيبي متسر بعيش عشان بتلهوج وبضطر اكذب.

= إخلصي خلصت روحك..

- ماشي.. إغلط إغلط مردودالك يا برنس.. مش هرد عشان
عيد وكده.. وانت برضه حبيبي والمز بتاعي.. يابو نضارات هتاكل
وشك انت يا معسل.. ما تيجي نلبس ونروح لما تمك واحشاني أه
والنعمة..

= طالما أمي واحشاك يبقى انتي عاملة مصيبة..

- تصدق صح.. برافو يا جيمي.

= هفقد أعصابي وربنا..

- خلاص يا عم.. العمر واحد والرب واحد.. بس وحياة أملك يا
بيبي قدر موقفي..

= بوظتي الكحك؟!

- لأ نو.. هو باظ لوحده..

= لوحده.. يعني بوظ نفسه.. أظلم ولا أجيب لطامة؟!

- صحتك يا ببي.. بص أنا عملت العجين ونقشت الكحك
فضلة خيرك ورصيته في الصيجان وكتبت عليهم جيمي، ونزلتهم مع
اللي يتشك في معاميعه شكري لعم إبراهيم بتاع القرن.. الراجل
الناقص زعق للواد وقاله مش بنسوي خللي أملك تجيب جاهز من
بسكو مصر..

= وبعدين؟!

- قلت في بالي يا بت سويه هنا.. ورحت رصاه في صانيتين كبار
كده وحطيتهم في القرن.. وقلت أتابع تحت السيطرة على ما
يستوي..

= وإيه اللي حصل؟!

- علي المخدرات لحست دماغه وكان عايز يعتدي على هانيا
وجريت منه.. اسكت يا جيمي مش اتشلت في الآخر..

= علي مين؟ وهانيا مين؟ إلهي تتشلي.. فين الكحك؟!

-

= خرسيتي ليه كملتي..

- نسيت الصانية في الفرن واطحرق الكحك..

= يحرق بيتك.. طب والصانية الثانية؟

35

الحر

- إيه ده مالك يا جيمي؟ إنت حد دلقي عليك مية؟ وإيه ريحة
الزفارة دي؟ إنت جايب ملوحة؟

= دلقي إيه وملوحة إيه انتي كمان! ده عرق ..الجو تحت نار..

- يا ساتر يا رب ع الريحه..

= نعم! تقصدي إني معفن!

- لأ يا بيبي أنا اللي مناخيري فوتت ..خش إنت انقع نفسك تحت
الدهش، وانا هتحفظ ع الهدوم دي في كيس .. أعاقب بيها العيال لو
مسمعوش الكلام!

= تخيلي يا ساندي....

- لا ساندي إيه وأتحيل إيه .. إحنا كده مش هنلحق نتخيل .. خش
خد دش ونتخيل على نضافة ..

= طيب إنتي هتعملي إيه؟

- هو انت مسافر السعودية .. خش يا جيمي هياغنم عليا
والنعمة .. أنا هولع بخور وهشغل التكيف اليتيم اللي في الصالة ..
خلص وتعاللنا ..

= مفيش شاور چيل؟

- بلاش تناكة يا روعي .. الشاور چيل خطر في الظروف دي ..
إضرب اللوكس اللي في الصبانة .. وكتر في الصابون على قد ما
تقدر ..

- نعيمًا يا بيبى أهو كده الكلام ..

= الله ينعم عليكى .. شوفيلي كده البنطلون إتنتش في
التوكتوك .. غالبًا كان فيه مسمار ..

- الهدوم تعيش انت!

= يعني إيه؟!

- يا بيبى أنا والعيال كنا هنموت م الرجحة .. لبست الواد شكري
كمامة من بتوع إنفلونزا الخنازير .. كان شكله مسخرة .. ورماهم ..

= ر .. إيه! رماههم!؟

- يا جيمي دا بتاع الزبالة جاله هارت أتاك وهو يحاول يكشف الكيس لولاش عم ناصر الجزار رقعته على على ضهره بخشبة الساطور كان مات .. آه والنعمة..

=يا ساندي ده الطقم الجديد اللي جبته من التوحيد والنور العيد اللي فات .. حرام! كنتي غسليته..

- والله ما كان ينفع .. عيالك كانوا هيتيموا .. يرضيك؟
=كنت بحبه..

- محافظتش عليه ليه!

= الجو كان حر زيادة عن اللزوم وجسمي مستحملش..

- يعني انت جسمك مستحملش عايزي أنا أستحمل!

= بس تعرفي أنا مبسوط بلمتنا اليومين دول .. أول مرة أحس بجو العيلة شوفتي وجود الأب والأم في البيت بيعمل إيه..

- لا يا جيمي ده مش جو العيلة ده جو التكييف .. إحنا ملمومين هنا عشان التكييف..

= إيه الإحباط ده؟! دانا كنت لسه هقول كلام حلو أوي..

- جيمي متفرهدنيش والجو نار..

=طب مش هاكل؟

- الأكل عندك في المطبخ يا دوبك تغرف..

= يا ساندي أنا لسه جاي وتعبان قومي انتي..

- مكشش انعزر يا عيون ساندي ..أنا طول اليوم قدام هبو الفرن
والبوتاجاز ..قوم إنت خدلك تان شوية..

= عشان خاطري يا ساندي تعبان!

- وأنا اللي كنت في الجاكوزي الصبح ..مانا هلكانة طوووووول
اليوم!

= ماشي هقوم وأمرني لله..ترات تارا ترات تارا ..تيرات تيرا
تيرات تيرا...مفيش صاحب بيتصاحب ..مفيش ساندي بقت
ساندي ..من النهاردة فكرية ..

- اللهم طولك يا روح ..خلي اليوم يعدي يا ولاد أبو سليم
اللبنين!

= فين الأكل؟

- ما هو عندك في المطبخ.

= مفيش حاجة في المطبخ ..ولا أنا الحر عماني..

- إفتح التلاجة هتلاقي علبة التونة إفتحها وخطها في طبق وخط
زيت ولمون والعيش ع الرخامة في الكيس الأصفر..

= كيس أصفر! أو مال هبو إيه؟ وفرن إيه؟ أنا قلت هلاقي المحمر
والمشمر ..

-

= اتكتمتي ليه ما تنطقي؟!

-هو انا مقولتلكش؟!-

=لا ما اتيلتيش..

- أصل الولية صفاء اللي في الخامس نزلت الصبح ومعاها ثلاث
بتتجانات وقالتي ما تيجي يا ساندي نعمل بابا غنوج ..فوقفنا
عملناهم وضربنا الطبق كله

= حسبي الله ونعم الوكيل..

- أبعث أجييلك كشري؟

= خليه يكثر البصل ويزود الشطة.

- بواسيرك يا بيبي..

= إلهي تطلع بواسيرك يا بعيدة..

- بعشقتك يا شقي يا أبو ريحة إف كلها يآ..

تمت

التعريف بالكاتب...

- أحمد أبو النصر كاتب مصري شاب اتولد في السعودية في يوليو سنة ١٩٧٨ ، وبعدين واضح أنه لقاها حر أوي فقرّر يرجع بلده ويكمل دراسته في أم الدنيا مصر.. اللي جوها حار مترب صيفا ديب فريزر شتاء، دَرَس في كلية الآداب قسم إنجليزي وكمان اشتغل في الماجستير - خلص تعليمه وهوووب اشتغل في الميديا ودلوقتي هو اسم النبي حارسه وصاينه مدير عام شركة كبيرة اسمها برزنتيشن ميديا.. بالنسبة للكتابة هو الله أكبر عليه بيكتب بقالة كتير وله شوية قصص حلوين.. أبقوا اسألوا على كتبه هتلاقوها حلوة..

- صدر للكاتب..

شيء فيك يشبهني .. قصص

- تحت الطبع..

النداء الأخير .. رواية

بين بيروت ومكة يعيش إنسان .. رواية

وثامنهم كلبهم .. قصص

للتواصل مع الكاتب

الصفحة الشخصية

(أحمد أبو النصر Ahmed Abuel Nassr)

أو تخبطني واحد فولو متين على تويتر Twitter

@abuelnassr

ومش معقولة مش هتعمل like لصفحة الكتاب على الفيسبوك

أحمد أبو النصر

عايز بقى نبقي اصحاب وكده ونعمل زي الأجانب ممكن تبعثلي

اللي عايز تقوله كله على الايميل المتواضع بتاع جنابنا

ahmed.abuelnassr@gmail.com

صفحة الكتاب على الفيسبوك

يوميات #ساندي_و_چيمي

متابعتم حاجة تشرف الحقيقة...

الفهرس

5	إهداء
9	مقدمة
11	BCC سفرة
15	الفرح
21	الأهلي
27	كارفور
31	مترو الأنفاق
37	التحرش
43	المصيف
49	عيد الحب

55	جنينة الحيوانات
61	صبايا سهام سعيد
67	الهدوم الشتوي
71	المطبخ
77	آلة الزمن
83	الامتحان
89	الانتخابات
93	القراءة
97	سانتا كلوز
101	عيد الميلاد
107	المذاكرة

115	المصروف
121	الإلهام
127	السينما
133	البيتزا
139	حمامها
145	السواقة
151	أنا بنوثة عسولة
159	البرد
165	الدايت
169	الرصيد
175	بوكيه الورد

181	كذبة أبريل
185	الفسيح
193	النور
199	كحك العيد
205	الحر

